

Nuu i e xé'e Xuva kō é kūtuní San Juan

Nuu i e tá'xi Jesucristu é kūtuni ko

¹ Sá'ā tá'xi Jesucristu é kūtuni ko. É xē'é Xuva kō é kā'an ñá nī ña ntáde tsiñu iña ña nuu i e dokó sa xee ntuvi é kūntaa ntí'i é kāká'an ña. Taxnūu ña ánje ñā é kā'an ñá nī kó, xu'u é Juaán u, nuu i sá'a.

² Kaka'án u ni nto da mií e tékú ko vatā ó kaka'an Xúva ko, vatā ó kaka'an Jesúcrístú di. Kaka'án u nuu i sá'a é ñni mií u.

³ Nté kuān nte vá'ā o é da xōó ka ña'a, ña kanakuā'a nté koo kuvi rkontuví, nī ña é kāteku i é kāká'an tú'ūn sa'á ne, kade ntaa ña nee é kāká'an, tsí e xée etsin ntuvi é kūntaa ntí'i é ūve na'a kaká'an í'a.

Édē vá'a Juāan tutú iña é ū'xe úkūn san

⁴ Xu'u é Juaán u ne, kade vá'a ú tutú sá'á iña é ū'xe úkūn san é ntoo ñuú Asia. É nī'i nto é vā'á iña Xuva ko. É nī'i nto é kuntōo vá'a nto nta'a Xuva kō, ña é tuví vevíí ne, ña é kuan tsí ó tuví nte ntúvi dí'na ne, ña é kuan koo kutúví ntii dañu ntūvi, dívi ña ni ū'xe espíritū, ña ntoo nú tēu ñá,

⁵ ni Jesúcrístú di, ña é da mií é kāká'an é nuu é ntaā i. Dí'na ña ntóto ña é un ntíí ntíí ña é xi'í san ne, kade kú've ña iña un ntíí ntíí rei, ña ntántoo ñuxiví a. Kuñima ñá kō ne, nantíi ña kō dá ñu'u kutu o ni kuétsí kō, tsi éti ña niñi ñá e ntá'vi ña kuétsi kō.

⁶ É tá'xi Jesucristu é kadā kú've o, é vīi o dútu iña Xuva ko, dívi Úva ñā. Ntadiá'vi ña, dívi ñā, tsi dóo ntii iní ñá ntii dañu ntūvi. Kuan koo na kōo.

⁷ Koto nto tsí Cristú ne, ki'xi ña mé'ñu vīkó san. Un ntíí ntíí ña'a sán kiní ña ña, un tsi nte ñá'a, ña é ntuku ku'i ña. Dōó kueku un ntíí ntíí ña'a, ña ntoo da mí'i ká ñuxiví a, kuenta iña ña. Kuān koo kuvi nti'xe.

⁸ “Dīvī ú e di'na ú ne, dīvī ú é ntiī ú ata i kán dī”, ka'an Xúva kō, ña é kadē kú've é un nti'í, ña é tuví vevii, ña e dúkuān tuví nte dí'na, ña é kutūví ntiī dañu ntūvi.

Dā íni Juaan e dóo ka'nu Cristu

⁹ Xu'u é Juaán u ne, ta'an ko ūn ntíí ntíí o. Dadíi tsi ntánto'o ko kuēnta iña Jesúcristu, tsí uun tsō nuu Xuva kó ne, dadíi tsi kata'xi Jesucristu é na kā'nu tsi vii ó nima ko. Nuú kutū ú ñuú Patmu é tuví mé'ñu ntute ñū'u san kuenta iña tú'un Xuva kō, é kaka'án u xoo é Jesucristu.

¹⁰ Uun ntuvi dá iō dá'na é kunūu iní ko Xuva kō ne, ínūu Espíritu Xuva kō nimá ko. Tēkú ko é kāka'an ún tatsin atá ko. Un ntiī tsi kāka'an, vātā ó kakuvi dá kaeku trunpetá san.

¹¹ Kaka'an:

—Xntēén na'an é un nti'í é kaínín ve. Kidáā ne, taxnuun tutú san iña é ū'xe úkūn é ntoo ñuú Asiá, ni ñūú Efesú, ni ñūú Smirná, ni ñūú Pregamú, ni ñūú Tiatirá, ni ñūú Sardí, ni ñūú Filadefiá, ni ñūú Ladicea —ka'an tátsín san.

¹² Xkokōtó u atá ko vata koo é kīnī u xoo é kāka'an í nī ko. Kidáā né, iní u u'xe tūn tsumē é dī mii tsí kaá kuaan kúvi.

¹³ Mé'ñu tun tsumē é ū'xé san ne, ntitsí uun ña'a, ña vata kaa ñatíí kaa ña, é nuu ña doo kani nte rkun xé'e ña xee. Katīnuu nté xkintika ña ñíí í'xí ña e kúvi kaá kuaan.

14 Idi dikí ñá ne, kuī'xin kue'en vātā ó kuī'xín katsi, é vāta ito ka'xin é kuī'xin kue'en. Ntuxnúu ñā ne, kaxi'í nuu vatā ó kai'xí ñu'u.

15 Dī'ín ñā ne, kaxi'í nuu vatā ó kaxi'í nuu dá kai'xi kaa dá kākuvá'a ini urnu kan. Tátsin ñā né, vata kaa te ntūte ka'nu é kainu.

16 Ní'í nta'a ñā ū'xé xntivi nta'a kua'a ñā ne, xu'u ñā kí káa kāni e ntíko ntuvi núu í ne, kai'xi kué'en núu ñā, vatā ó kai'xi ngántii da dóo i'ni.

17 Dā ini ú ñā ne, uun xío vitá tsu nú dī'ín ñā vata tē xi'í u. Kidáā ne, tīin nta'a ñā kó nta'a kua'a ñā ne, kaka'an ñā nī ko:

—Ñá ku ū'vi o. Xu'u é di'na ú ne, xu'u é ntii ú ata i kán di.

18 Xu'u é kántito u. Xu'u é xi'í u, ntá tsi vevií ne, kantito ú ntii dañu ntūvi. Xu'u é kadē kû'vé u iña doxi'í san nī dô'vi kan.

19 Tsuven nā'án un ntí'i nuū i é inin, é kākuví vevií nī é kūví rkontuví di.

20 Núu i sā'a é iō xu'u iña é ū'xe xntivi san é inin é ni'í ntā'a ú nta'a kua'a kó san, ni ū'xe tún tsumē e kúvi kaá kuaan. Kīmi é ū'xé san ne, divī ánje, ñā ñu'u ntā'a i é ū'xe úkūn san. Tun tsumē é ū'xé san ne, náa ī é ū'xe úkūn san.

2

Tú'un iña é ū'xe úkūn san, di'na iña úkun ñūú Efesu

1 'Kadan vá'an tutú iña ñā nuu nta'a i úkūn ñūú Efesú san ne, ká'an tsí Xu'u é nta'a kuā'a kó ni'í ntā'a ú é ū'xé xntiví san, Xu'u é kaika mé'ñū ú é ū'xe tún tsumē e kúvi kaá kuaán san ne, kaka'án u ni ñā:

2 Iní ntí'i ú nee é kāden. Iní u tsi dóo kaxión ntīin é kāden tsiñun, tsi dóo ka'nu iní o. Iní u tsí ñā kakutín nima ó ni ñā'a, ñā é kīni ntāa san, tsi íton nteén ñā é ká'an ñā é pustru ñā ne, kūtuni o tsi dóo vete ñā.

³ Iní u tsí ka'nu iní nti'xe o, tsi dóo ntó'o o da dé tsiñun kuenta iñá ko; ñá ni kudu'xen o.

⁴ Ntá tsi ió nuu i é kuetsí o: tsí ña kakuinimá ka o kó vata o kuínima ó ko kídaā.

⁵ Naká'an o vē mí'i ko'xón nteen ne, na nātivi iní o. Vīn xtukun vatā o dén kídaā. Tē ña'á ne, da nēe inī tso xee u mí tuvín ne, naki'i ú tun tsume o mí ntitsi, tē ña nātivi iní o.

⁶ Ntá tsi ió nuu i é kāden é vā'á di, vata kaa é ña ntío o nuu i e ntáde ña'a, ña ntántikin ñá nani Cūlaá san. Ña xkúntee iní ko di é kuān o ntáde ña.

⁷ Te inin é kīnin ne, kinin é kāka'an Espíritū sán nī ña ntákuinti'xe i san! Xoo é kūvi vii i ne, ta'xí u itsi é kā'xi ña kiti utun é nī'i ña ntuvi iña ña é ntítsi mē'ñu mí e dóo va'a mí tuví Xuva kō. Kuān koo ka'an.

Tú'un iña úkun ñūú Smirna

⁸ Kadan vá'an tutú iña ñá nuu nta'a i ūkún ñuú Smirná san. Ká'an tsí Xu'u é dī'na ú nī e ntii ú ata í di, Xu'u é xi'í u ne da ntóto xtúku ú ne, kaka'an u ni ñá:

⁹ Iní u é un nti'i é kāntó'o o. Iní u é kātaan núu o, ntá tsi kuikān nuu Xuva ko. Iní u tsí ntáka'an kīni ña Israeé san iña o. Ña sá'á ne, da ntáka'an ña é ña Israeé ña, ntá tsi ña te ña Israeé nti'xe ña, tsi ntáduku ntée ña tó'o e ña vā'ā san.

¹⁰ Ña ku ú'vī o nté koo nto'o o rkontuvi. Iō ntó ne, vii tó'o e ña vā'ā san é ku'un kutu ntō vata koo é kōto nteé ña nto tē nuu é ntaā i e ntákuinti'xe nto. Ú'xi ntūvi é ntō'o nto. Ntá tsi ñá ku xtuvín miin é kākuinti'xe o kó, kuān te kuvin, tsí ta'xí u ntuvi iña o é kutūvín nī kó ntii dañu ntūvi.

¹¹ Te inin é kīnin ne, kinin é kāka'an Espíritū sán nī ña ntákuinti'xe i san! Xoo é kūvi vii i ne, ña te kúvī ñá tē xi'i ña é kūvi uvi íto san. Kuān koo ka'an.

Tú'un iña úkun ñūú Pregamu

12 'Kadan vá'an tutú iña ñá nuu nta'a i ūkún ñuú Pregamú di ne, ká'ān tsí Xu'u é nī'i u káa kāni é ntiko ntūvi núu í ne, kaka'án u ni ñā:

13 Iní u tsí tuvín mí kadē kû've tó'ō e ña vá'ā san, ntá tsi kantīkin dúkuān ko. Ñá ni xtuvīn miin e kuínti'xe o kó, kuān te dīvi tsi ñuu mí tuví tó'ō e ña vá'ā san é'ní na ña é kāka'an é vā'á iñá ko, ñá nani Āntipá san.

14 Ntá tsi Ió nuu i é kāden é ña xkúntee iní ko: tsí ña'a o iō ñá, ña e ntántīkin dúkuān tú'un vatā o nañé'e Balaan, ña é xe'e ítsi rei Balaa é kā'an ñá nī ña Israeé san é vii ña é kīni kaa: é kā'xi ña é xe'é ña'a san iña sántu ñá, nī é vii ña é kiní kaa ni ñad'í san di.

15 Iō túku ña'a o, ña e ntántīkin tú'un vatā o nañé'e ña ntántīkin ñá nani Cūlaá di. Ña xkúntee iní ko é kuān koo vii ña.

16 Dukuān ne, natīvi iní o ve. Tē ña'á ne, da nēe inī tsó xee u mí tuvín ne, náā ú ni ña ni tū'ún ko e dóo ntiko é vāta kaa káa kāni é kākii xu'u ko.

17 ;Te Īnin é kīnin ne, kinin é kāka'an Espíritū sán nī ña ntákuinti'xe i san! Xoó ña'a, ña é kūvi vii i ne, kué'ē u é kā'xi ñá tañu'u é vē'xí e dukún kán. Kué'ē ú ña uun xuu kui'xin é nteé na'a uun dīvi xee e nté uun xoxo ña iní i nēe dīvi, tsí da mii tsī ña é nī'i i xuú san é ĩni ña. Kuān koo ka'an.

Tú'un iña úkun ñuú Tiatira

18 'Kadan vá'an tutú iña ña nuu nta'a i ūkún ñuú Tiatirá di. Ká'ān tsí Xu'u é I'xá Xuva kō kúvi u, Xu'u é kai'xi ntúxnū ko vatā ó kaxi'í nuu ntúve ñū'u, Xu'u é kai'xi dí'in kó vatā ó kai'xi kaá kuaán ne, kaka'án u ni ñā:

19 Iní ntí'i ú nte o den. Iní u tsi dóo kakuinima ó, tsi dóo kakuinti'xe o kó di, tsi dóo kade tsiñun dí ne, dōó ka'nu iní o di. Iní u tsi dií ka vá'ā ó kaden vevii é vatā o dén kídaā.

²⁰ Ntá tsi ió é ña xkúntee iní ko: tsí da vá'a tso é kanañé'é ñadĩ'i, ñá nani Jesēbeé san. Kaka'an ña é tū'ún Xuva ko kākā'an ña, ntá tsi kade vete ñā. Kaeni nta'ví ña ña'á ko, ña ntákuinti'xe i san, tsí kaka'an ñá ni ñā é viī ña é kini kaa ni ñadĩ'í san, nī é ka'xī ña é xe'é ña'a san doméni iña sántu ña.

²¹ Xé'e ú ña ntuví vata koo é na nātivi iní ña kuétsi ñā, ntá tsi ña ni ntío ña é xtuvī mii ña é viī ña é kīni kaa san.

²² Nakō'xó u ña nu itó ña ni ūn ntíí ntíí ña'a, ña e ntákidi ni'i ñá ne, kué'ē u é ntō'o ñá tē ña nātivi iní ña nuu i e ntáde ña.

²³ Ka'ní kue'én u i'xá ña. Kidāā ne, kutuni un ntíí ntíí ña'a úkun san tsí xu'ú ne, ini ntí'í u e ntádē kuení nto, é un ntí'í é ntío nima ntó ne, ntánāā u ni nto kuēnta iña i é edé nto é un é un nto.

²⁴ Ntá tsi nto'o e ntántoo nto ñuú Tiatirá, ntō'o é ña te ntántikin nto é kanañé'é ñadĩ'í san ne, ntō'o é ña ni ñakua'a nto nuu i e dóo vi'xín o iña é ña vá'ā san. Ñá ká'án ka ú ni ntō neé viī nto.

²⁵ Da miī é ña ku xtūví mii nto nté un siin e ntákuinti'xe nto da nté nainú u.

²⁶ Tē xoo é kūvi vií i, xoo é kūtií i é vīi é vā'a da nté nainú u ne, kué'ē u é kadā kú'vē ñá iña da mí'í ká ñuú,

²⁷ vatā o tá'xi Uvā ko é kadā kú'vé u dī. Tátūn e kúvi káa kada kú'vē ñá ni ñā. Ntada utsi ña ñuú san vatā ó kakuvi kídī nte'u dá káta'vi.

²⁸ Kué'ē ú ña kímī é vē'xi túvi sán dī.

²⁹ ¡Te Inin é kīnin ne, kīnin é kākā'an Espíritū sán nī ña ntákuinti'xe i san! Kuān koo ka'an.

3

Tú'un iña úkun ñuú Sardi

¹ Kadan vá'an tutú iña ñá nuu nta'a i ūkún ñuú Sardi ne, ká'án tsí Xu'u é nuu nta'a ú u'xe espíritu

Xuva ko ni ū'xé xntiví san ne, kaka'án u ni ō. Iní u nte xkóon dēn. Kantítion, kuiní ña'a san, ntá tsi ñá te nuu é ntaā i, tsi é xi'in.

² Ntoton ve. Koon ntiin nī é ntoo ká san di'na dá nti'ī kue'en. Váta kīnī u nee é vā'a é kāden nuu Uvā ko.

³ Naka'an o tū'un é ĩnín nī e téku o nte dí'na. Nātiví iní o ne, kadan ntaan nēe é vā'a é ĩnin. Tsi tē ña kantítion ne, da nēe inī tsó xee ú vatā ó de ña du'u, é ntē ñá inin neé ura xee u mí tūvin.

⁴ Ntá tsi ió ka kudii ña'a o, ña ntoo ñuú Sardi, ña é ña ni kudéntu dōo i. Dadii kaka ú ni ñā é ñu'u ña doo kui'xin, tsi dóo va'á ña'a ña.

⁵ Tē xoó ña'a, ña é kūvi víi i ne, ní'i ñā doo kui'xin é kū'un ña. Ná nakāte ú divī ñá iní tutu mí ūve na'a xoo é ni'i i ntuví va'á iña í ne, ka'án u ni Uvā kó nī ánje ñā tsí ña sá'á ne, ntáduku ntée ña ko.

⁶ ¡Te ĩnin é kīnin ne, kinin é kākā'an Espíritū san ni ña ntákuinti'xe i san! Kuān koo ka'an.

Tú'un ñña úkun ñnú Filadefia

⁷ Kadan vá'an tutú iña ñá nuu nta'a i ūkún ñuú Filadefiá ne, ká'ān tsí Xu'u e dóo va'á u, Xu'u é kākā'án u é nuu é ntaā í, Xu'u é nī'i nta'a ú ntakāá rei Davii. Te Xū'ú nakaán u ne, nté uun xoxo kuvi nakadi i ne, te Xū'ú nakādi ú ne, nté uun xoxo kuvi nakaán i. Xu'ú ne, kaka'án u ni ō.

⁸ Iní u nte xkóon dēn. Koton, tsi é nakaán u xi'i mí kī'in ne, ntē xoxo kuvi nakadi i. Tsí iní u tsí kuān té ña tuvi ntíi o ne, ēden ntaan é kākā'án u, ñá ni ká'an te ñá inín ko.

⁹ Koton, tsí ió ña'a, ña ntántikin tó'ō e ña vá'ā sán ne, ntáka'an ñá tsi ña Israeé ña, ntá tsi ña ntáa, tsí vete ñā. Koton, tsí víi u é na kūnchítí ña nú dī'in o vata koo é kūtuni ña tsi dóo kakuinimá ko o.

10 Tsí ña ni kudú'xen ō é kādan ntaan é kāka'án u ne, kūtí' nti'i o. Dukuān ne, nada'án u o tē xee ntúvi é ntō'o ña ntoo dá kan# ñūxivi san, dá kōto nteé u ña ntántoo nú nte'u san.

11 Ña ná'ā ka dá nainú u. Kuenta tsí viin é nī'i o vata koo é xoxo naki'i núu i doméni é nī'i o.

12 Xoo é kūvi víi i ne, kué'ē u é kī'i ntii ña vi'i Uvā kó ntii dañu ntúvi. Nté uun ito ká ña ntii ña mí tuví ña. Xntēé u kúñu ña dīví Uvā kó ni dīví ñuú Uvā kó, dīvi Jerusáleén xee é vē'xí nte e dukún kán. Xntee ú ña dīví xeé ko di.

13 ;Te ĩnin é kīnin ne, kinin é kāka'an Espiritū san ni ña ntákuinti'xe i san! Kuān koo ka'an.

Tú'un ña úkun ñūú Ladicea

14 'Kadan vá'an tutú iña ña nuu nta'a i ūkún ñuú Ladiceá ne, ká'ān tsí Xu'u é kaka'án u é kuan koo na kōo. Ñá te kaēni nta'ví u, tsí da miī é nuu é ntaā i é kaka'án u. Nta'a ko vé'xi un nti'ī é ede kú've Xuva kō.

15 Xu'u kaka'án u ni ō tsí iní u nte xkóon dēn. Ntē ña te i'nín ne, ntē ña te ví'xin. Díi ka vá'ā ó tē dí i'nín né, o tē dí ví'xin.

16 Dukuān ne, da xé ña te i'nín, ntē ña te ví'xin ne, kakunte'xé ko o ne, ncho nantu'xen ú o.

17 Kaka'an tsi dóo kuikān, e dóo iō iña o, tsí ña tuví nee é kátaan nuú o. Ntá tsi ña kakutuni o te dóo nta'vín den, tsí ña te neé nuu á'vi o, tsí kanti'u ntuxnúu o ne, kantiín di.

18 Dukuān ne, ta'xi ú itsi nté koo viin: Ki'xin mí tuví u ne, kuiin kaá kuaan va'a é ña te neé kadáka vata koo é kukuikan ntī'xen. Kuiin doo kui'xin é kunūun vata koo é ña kuka'an nuu o é kantiin. Kuiin u'xen cho'ó di é kútsi nuu ntuxnúu o vata koo é na nāxi'í nuu o.

¹⁹ Xoó ña'a, ña é kākūinimá ko ne, kantantaá u ña mí'i é ña vá'ā ó kade ña ne, kaxe'é u é ntō'o ña. Kamán san koon ntiin ná nātivi iní o.

²⁰ Koton tsi i'a ntisí ntēé u xi'i o, kanake'xēn u. Xoo é kainí i tatsín ko ne, te nākaán ña xi'i ñá ne, kuítā ntí'xin u má vi'i ña kān ne, dá kā'xí dadꞑi ú ni ñā.

²¹ Xoo é kūvi vií i ne, kué'e u é kutūvi ñá diñi kó vatā o dé u da kivi idé u ne, ítūvi u diñi Uvā ko.

²² ;Te Īnin é kīnin ne, kinin é kākā'an Espiritū sán ni ña ntákuinti'xe i san! Kuān koo ka'an —ka'an tátsín san nī ko.

4

E ntánuu iní ña Xuva kō e dukún kān

¹ Kidáa ne, ĩto ú ne, iní u é kāntíi xi'i e dukún kān. Dīvi tátsín e téku ko dí'na é vata eku trūnpeta éku ne, kaka'an xtúku:

—Kūxeen i'á ne, dá nañē'e ú o nté koo kivi rkōntuvi —ka'an.

² Ura dú'va tsi i nakunúu u nta'a Espiritu Xuva kō ne, náñē'e ñá ko uun teu ka'nu é tuví e dukún kan ne, ikān tuví uun ña'a ñatīi, tínti'i ña nú tēú san.

³ Ña tsikán ne, vatā ó kaxi'í nuu xuu kuii é nanī jaspe kaxi'í nuu ña, ni xūu kue'e e dóo kai'xí di. Ntíkō diñi nú tēú san kaxi'í nuu rkuá'nti, vatā ó kaxi'í nuu xuu kuii é nani esmēralda.

⁴ Ntíkō diñi nú tēú san ntoo xtuku ká oko kīmi tēú san ne, oko kīmi ñata ntántoo ña di. Kui'xīn kue'en dóo é ñū'u ña ne, odo le'e e kúvi kaá kuaán diki ña.

⁵ Nú tēú é uun sán ne, kakii é kāxi'í nuu ne, kakañu'u, kakatsín di. Mí tūví tēú san ne, kai'xi ú'xe ñū'ū naa i é ū'xe espiritu Xuva kō.

⁶ Dìvi tsì nú tēú san dí ne, nuu mínī é kǎxi'í ni'ni vata kaa xuxu.

Ntíkō diñi nú tēú san ni mē'ñú i ne, ntâñi kîmi kítî é ntantító. Ñá te da dīi ntuxnúu tî uve ata tí ni nūu tî.

⁷ Kítî kuvî ūun sán ne, vata kaa ñaña kaa tî. Kítî kuvî ūví san ne, vata kaa duntîkî kaa tî. Kítî kuvî ūní san ne, vata ito ña'a ito tî. Kítî kuvî kîmî san ne, vata kaa tadun kítî kantava kaa tî.

⁸ Ngîmi kítî sán ne, uve iñu ntî'xin tî é un é un tî. Un tsi kokó ta'an ntuxnúú tî un tsi nte má ntî'xin tî. Ntē ntúvi ntē níñu e ntáka'an tí dīvi Xuva kō: ;Dìvi ntō é na kuiko ñu'ū ntí nto, Xuvā ntî.

Dìvi ntō é Xuva ntî'xe ntí nto,
ña é kuvî víi da nēé ka nuu i,
ña é tuvî kídaa,
ña é tuvî vevii,
ña é dā ve vé'xi!,
ka'an tî.

⁹ Vāta da ntáka'an kítî ntantító san e dóo va'á Xuva kō, e dóo ka'nu ña'a ña, dā ntaxé'e tî sintiá'vi nta'a ña é tuvî nú tēú san, ña é tuvî ntîi dañu ntūvi ne,

¹⁰ ñata, ñā é oko kîmi ñá'a sán ne, ntánakunchítî ña nú dī'ín ña é tuvî nú tēú san é ntánuu iní ña ña é kántító ntîi dañu ntūvi. Tsoo ñá le'e e kúvi kaá kuaan é ñū'u dikî ña nú tēú san, ntáka'an ña:

¹¹ Dōo va'á nto, é nakuiko ñu'ū ntí nto, Xuvā ntî, é kǎ'án ntî tsi dóo ka'nu nto, e dóo iō nto é víi ntó da nēé ka nuu i. Tsí nto'o de kú've ntíí ntîí nto dá nēé ka é iō. Tsí da ntío nto é kúvá'a ne, kúvá'a ntíí ntîí, ka'an ña.

5

Dā nakáa A Le'ntú san tutu é kätinuu

1 Iní u tsí ña é tuví nú tēú san ne, nta'a kua'a ña ni'i nta'a ña ūun tutu é katinuu. Tutú san ne, uve na'a ntuví o ata i. Ú'xe sēu úve ata i.

2 Iní u uun ánjē, ña dóo ntii inī í san ne, dóo ntii kaka'an ña:

—¿Xoó ntu é vā'á nti'xe i é kuvi nakāa tutú san? ¿Xoó ntu é kuvi nakāa mí uve seú san? —ka'an ña.

3 Nté uun ña'a, ña ntoo e dukún kán ne, nté uun ña'a, ña ntoo ñuxiví a, nté ña'a, ña ntoo doxi'í kán, ña ni kúvi nakāa ñá tutú san, ntē ña ni kuvi kiní ña é ūve na'a iní tutú san.

4 Xu'ú ne, ēku nti'xe u, tsí ña ni ní'i xoo e vá'a i é nakāa tutú san, ntē ña ni ní'i xoo koto nteé i.

5 Kidáā né, uun ña'a ñatā sán kaka'an ñá ní ko:

—Ñá kū ēkūn kan. ¡Un kaa Ñaña tatá Judaa, I'xá ika rei Dāví san! Dīvi ñā e kúvi idé ña é kuvi nakaā ñá tutú san. Dīvi ñā e kúvi nantīi ntée ña mí ūve u'xe seú san —kuan ō ka'an ñatā san ní ko.

6 Kidáā ne, iní u tsí íkan tsī ntīsi uun A Le'ntu mé'ñū nú tēú san, ni ngimi kiti ntantíto, ni ñatā san. Dító na'a i mí ni'i kui'i A Le'ntú san da é'ni ña'a sán i. Ú'xe ntīki i uve. Ú'xe ntūxnúu i di. Ntūxnúu i sán ne, náa i é ū'xe espíritu Xuva kō e táxnúu ña é kī'in dá kani ñūxiví san.

7 Ne, kué'ēn A Le'ntú san, kuki'i tutú san é ni'i ntā'a ña tuví nú tēú san nta'a kua'a ña.

8 Dā kí'i tutú san ne, ngimi kiti ntantíto san ni ñatā, ña é oko kimi ñá'a sán ne, nākani itī ña nuú A Le'ntú san. É un é un ñatā sán ne, ni'i nta'a ña ūun kiñú'u ni ūun ko'o kútū e kúvi kaá kuaan é ñū'u kútū e dóo vá'a ñe'e ú'me ī é kakene vatā ó ntáka'an ntā'ví ña ntáduku ntée Xuva kō.

9 Ntaíta ña nchu'ún xee é kākā'an:

Ntō'ó ne, dōo va'á nto é kī'i nto tutú san,

é nākaá nto mí ūve seú san.

Tsi é'ni ña'a san ntó ne,

ēti nto niñi nto é nakuín nto ña'a kuenta iña Xuva
ko,

ña vé'xi da nēé ka tatá i, da nēé ka tú'un ñā, da mí'i
ká ñuu vé'xi ña,

¹⁰ vata koo é kūvi vií ña rei ni dutu iña Xuva ko,
é kadā kú'vē ñá ñuxiví san,
ka'an ña.

¹¹ Kídāā né, ito ú ne, tēkú ko é ña te da díi ánjē
ntaíta ña ntíkō diñi teú san ni kīti ntantító san, ni
ñatā san. Ñá tē nté kaa nté kaa titín ña.

¹² Un ntii tsī kéne ña, ntáka'an ña:
jE dóo va'á A Le'ntu é xi'í san é nī'i e dóo kuvi vií,
nī e dóo kukuikā, e dóo ki'in inī í, e dóo ntii inī i,
e dóo kuiko ñu'u o ī, e dóo kada ka'nu o ī,
e dóo nakue'e o sintiá'vi nta'a i!,
ka'an ña.

¹³ Kídaā né, tēkú ko tsí un ntī'i nuū i é ntantító é
ntoo e dukún kan, nī nú nte'ú san, nī doxi'í kan, ni
ntute ñu'u kān ne, ntáka'an é uun ata tsi tātšin i:

jNa nākué'e o sintiá'vi nta'a ña tuví nú tēú san, nī A
Le'ntú san;
na kuiko ñu'u o ñā;
na kada ka'nu o ñā;
na kōo ña é viī ñá ntii dañu ntūvi!,
ka'an.

¹⁴ Ngimi kiti ntantító sán ne, ntáka'an ti:

—jKuan koo na kōo! —ka'an ti.

Ñatā, ña é oko kimi ñá'a sán ne, nākani iti ña un
tsi nte ñú'u kān é nuu iní ña ña é kāntító ntii dañu
ntūvi.

6

É ū'xe séu san

¹ Īní u dá nāntii nteé A Le'ntú san seu é kui ūun é ū'xe séú san. Tēkú ko tsí kaka'an uun kiti kantító sán ne, dītó vata te kākatsin:

—jKixkoton! —ka'an ti.

² Ītó u ne, ĩní u uun idú kuī'xin. Ńa ntekú ti ne, ni'i nta'a ña ntuvē. Xé'e ña ñā le'e é kuntēkú diki ñā ne, dā kii ña é viī ñā du'xēn né, kūvi idé ña ntii ña nuu i kān.

³ Dā nantii nteé A Le'ntú san seu é kui ūví san ne, tēkú ko é kākā'an kiti kantító, kiti kuví ūví san:

—jKixkoton! —ka'an ti.

⁴ Kidāā né, kii xtuku idú, kiti kuē'e kue'en. Ńa ntekú ti ne, ni'i nta'a ñā káa kāni. Ní'i ñā e kūvi vii ña é nāki'i ña é vā'á koo kuntōo ña'a san ñuxiví san, vata koo é kā'ní ta'an ña, xe un xé un ña.

⁵ Dā nantii nteé A Le'ntú san seu é kui ūní san ne, tēkú ko tsí kaka'an kiti kantító, kiti kui ūní san:

—jKixkoton! —ka'an ti.

Ītó u ne, ĩní u kii idú ntee. Ńa ntekú ti ne, ni'i nta'a ña xkú've.

⁶ Tēkú ko tatsin é vē'xi mí ntoo ngimi kiti ntantító sán ne, kaka'an:

—Uun xkú've kúdii nuní san ni'i ña xā'ví tsiñu ñā é uun ntūvi. Ūnī xkú've kúdii kiti sévada ní'i ñā xá'ví tsiñu ñā é uun ntūvi di, ntá tsi ña ku natīvín aseté ni ntūte vinú san —ka'an.

⁷ Dā nantii nteé A Le'ntú san seu é kui kīmí san ne, tēkú ko tsí kaka'an kiti kantító é kui kīmí san:

—jKixkoton! —ka'an ti.

⁸ Ītó u ne, ĩní u kii idú kuāan. Ńa ntekú ti ne, Doxi'í nani ñā. Áta ña vē'xí uun ña'a, ña é nani Dô'vi. Ní'i ña é kūvi vii ña ni dāva ña'a ñuxiví san é kuví ña mé'ñu du'xēn sán ne, ō kuví ña doko, ō kuví ña kui'í san ne, o kuví ña é kiti diín san ka'ní ti ña.

9 Dā nantii nteé A Le'ntú san seu é kui ū'ún san ne, iní u má nāa kan nima ñá'a, ña e é'ni ña'a san kuenta iña tú'un Xuva kō, tsí ña ni u'ví ña é ká'an ñá iña Xuva ko.

10 Nñi kue'één ini ña ntáka'an ña:

—Xuvā ntí, ka'nu kue'en nto. Ntō'o é sāntu ntí'xe nto. Ntō'ó ne, un ntí'í é kāká'an nto é nuu é ntaā i. ¿Nēe ntúvi ntu kada kú'vē nto iña ña ntántoo ñuxiví san é ntānáa nto ni ñā'a, ña é'ní ntí? —ka'an ña.

11 Kidáā ne, dá un dá un ña ni'i ña doo kui'xin é kū'un ña. Kaka'an ñá ni ñā é diin diín tsi kuntōo ká ña, da nté xee tá'an é kūví ntí'í ta'an ña é dadñi ntáde tsiñu ña iña Xuva ko.

12 Dā nantii nteé A Le'ntú san seu é kui iñú san ne, itó u ne, kutūní ko é un va'a vá'a tsi taan ne, kuntee kué'één ngantií san, é vata kaa doo ntee é xkū'ún ña'a dá ntoo ña dontíni. Xóō sán ne, kukué'e kue'en váta ito nñi.

13 Xntívi é ūve e dukún kán ne, nakó'xo nté ñuxiví a, vatā ó kanako'xo kiti tun igu uté san da dóo kainu tatsin ka'ni.

14 Ntoko ñu'u mií e dukún kan, vatā ó kakuvi vikó san dá kántava. Un ntíí ntíí xuku ni ūn ntíí ntíí ñu'u é ntoo nú ntute ñu'u kán ne, nakuntoó xio.

15 Kidáā ne, naku'un xū'u ntíí ntíí rei, ñá ntoo ñuxiví a, nī ña na'nu ña'a sán, nī tó'ō sntadún san, nī ña kuiká san, nī ña e dóo ntii iní í, nī ña ntáde tsiñu, nī tó'o ña ne, ñú'u xu'ū ñá mâví ni nē'u xuu.

16 Ká'an ña ni xūku sán ni xūú san:

—¡Na tñi mí ñu'u ntí. Na tāví ntí vata koo é ña kiní ña tuví nú tēú san ntí, tsí un vá'a tsi kakudiin A Le'ntú san nī ntí!

17 Tsí e xee ntúvi ka'nu é tā'xi ña é ntō'o ko ne, ¿xoó ntu kutíi? —ka'an ña.

7

Tatá ña Israee, ñá uve nā'a seu Xúva kō

¹ Kidáā né, íní u kimi ánjē, ña ntāñi ngimí o diñi ñuxiví san. Ntaédí nuu ña mí kaki'xi ngimí tatsín san vata koo é ña kunú ka tatsín san ñuxiví a, nté nú ntute ñu'u kān, nté da mí'í ka má utun.

² Kidáā né, íní u tuku ánjē, ña vé'xí nte mí kene ngántí san, ni'i nta'a ña sēu Xúva kō, ña é kántíto ntí'xe. Un ntii tsí kéne ña, kaka'an ñá nī ngimi ánje, ña nguī san, ña é xe'é Xuva ko itsi é nativí ñá ñuxiví san ni ntute ñu'ū san:

³ —¡Kuntētu ká nto! ¡Ñá kū dí nativí ntó ñuxiví san, nté ntute ñu'ū san, nté utun san dá nte kuví xntéé ntí seu Xúva kō xteén ña'a, ña e ntáde tsiñu iña ña! —ka'an ña.

⁴ Tékú ko nté kaa ña'a uve na'a ña séu san, tsí uun sientu uvi díko kimi míil ña'a tatá ña Israee san.

⁵ Uxuvi míil ña'a tatá Judaá san uve na'a ña séu san, uxuvi míil ña'a tatá Rubeén san, uxuvi míil ña'a tatá Gaá san,

⁶ uxuvi míil ña'a tatá Asee san, uxuvi míil ña'a tatá Neftalí san, uxuvi míil ña'a tatá Manaseé san,

⁷ uxuvi míil ña'a tatá Simiuún san, uxuvi míil ña'a tatá Leví san, uxuvi míil ña'a tatá Isacaá san,

⁸ uxuvi míil ña'a tatá Zabuluún san, uxuvi míil ña'a tatá Joseé san, uxuvi míil ña'a tatá Benjamiín san. Kuan ō ñá uve na'a ña séu san.

Ñá te da dī ña'a, ña ñu'u doo kui'xin

⁹ Kidáā né, íto ú, íní u ña te da dí ña'a, ña ntāñi nú tēu san ni nūu A Le'ntú san. Ntē ña kuví ká'vi o ñā e dóo titín ña, ña é vé'xí da mí'í ká ñuu dá kaniñi ñuxivi. Ntáduku ntée ña da nēé ka tatá ña; da nēé ka tú'ūn ntáka'an ñá dí. Doo kui'xín ñu'u ña ne; odo nta'a ña ntā'a ñuu.

¹⁰ Un ntii tsi ntáka'an ña:
 Da mii tsi Xuva kō, ña tuví nú tēú san,
 nī A Le'ntú san, ña é kuvi nakáku kō,
 ka'an ñá'a san.

¹¹ Un ntíí ntīí ánjē san ntáñī ña ntíkō diñi nú tēú san,
 ni ñatā sán, nī ngimi kítí ntantító san. Nákuntoo tixi
 ñā nú tēú san ne, nánū'u ñá iní ña Xuva kō,

¹² ntáka'an ña:

¡Kuan koo na kōo! Na kada ka'nu o Xuva kō,
 tsi dóo kaxi'í nuu ka'nu ña, dōó ki'in iní ña.
 Na nākué'e o sintiá'vi nta'a ña ne,
 na kuiko ñu'u o ñā dī,
 tsi dóo iō ña é vii ña; dōó ntii iní ña.

Kuan koo na kā'an o íña Xuva ko ntii dañu ntúvi.
 Kuan koo na kōo,
 ka'an ánjē san.

¹³ Kidáā ne, kaka'an úun ña'a ñatā san ní ko:

—¿Nēe ñá'a ntu ña sá'á, ña ñu'u doo kui'xín san?
 ¿Mí'í ntu vē'xi ña? —ka'an ña.

¹⁴ Kidáā ne, kaka'án u ni ñā:

—Ntō'o é īni nto —ka'án u.

Kidáā ne, kaka'an ñá nī kó:

—Ña sá'á ne, divi ñā é vē'xi ña mi dóo ntánto'o
 ña'a. É ntukui'xín kue'en dóo ña, tsí niñi Á Le'ntú
 san nácate ña.

¹⁵ Dukuān e ntáñī ñá nú tēu Xúva kō, e ntáxntii ña
 ñā nte ntúvi ntē níñu ini ukún ña kán. Xuva kō, ña
 tuvi nú tēú san, kunuu mé'ñu kunuu dava ña ña.

¹⁶ Ña kákān ká ña, ntē ñá itsí ka ñá ntute. Ña kókō
 ká ña ka'ni ngántíí san, tsí kuntoo ña mi é vē'tí san
 ve.

¹⁷ Tsí A Le'ntu é tuví nú tēu kán ne, kuenta vii ña
 vata kaa uun paxtu, é kī'in ní'i A Le'ntú san ña mí
 kakii ntute kuī é nī'i ñá ntuvi íña ñá ne, mii Xuva
 ko naĩtsi ñá un ntí'i ntute nūú ña —ka'an ña.

8

Seu e kúvi ū'xe ni ko'o kútū e kúvi kaá kuaan

¹ Dā nantii nteé A Le'ntú san seu é kúvi ū'xé san ne, xíō kadin kue'en tsi e dukún kan te dāva ura.

² Kidáā ne, iní u u'xe ánjē ntáñī ñá nuu Xuva ko. Odo ña kui kui uun ña trunpeta.

³ Kidáā ne, xéē ká uun ká xtuku ánjē, ní'i nta'a ñā ko'o kútū e kúvi kaá kuaán san ne, kántĩtsí ña nú nāa kan. Dōo kue'e kútu ní'i ña é nādaká ta'an ña ni tū'un e ntáka'an ntá'ví ña'a, ña ntánuu iní i Xuva kō, é kuē'é ña nú nāa e kúvi kaá kuaan é tuví nú téu san.

⁴ Kúxēe u'me kútū san é ni'i ntā'a ánjē sán ne, xée mí tuví Xuva ko dadꞑi ni tū'un e ntáka'an ntá'ví ña e ntáka'an ni Xuva ko.

⁵ Kidáā né, kī'i ánjē san ko'o kútū sán ne, dā tsú'un tsitu ña ngiñū'u é kai'xi nú nāá san ne, da nakuíta nuu ña ñuxiví a. Dōo dito káñu'ú ne, xí'í nuu ne, táān di.

Trunpeta é ū'xé san

⁶ Kidáā ne, ánjē, ña é ū'xe ñá'a, ñá odo trūnpeta san ne, íō tu've ña é nakuéku ña.

⁷ Ánjē, ña é kúvi ūun sán ne, nakuéku ña trunpeta ña. Ura tsí i kán davi xuú ni ñū'u é kādaka níñi ñúxiví kán. Uun ta'vi í é kúvi ūni ta'vi ñúxiví san ne, í'xi ntí'í. Uun ta'vi í é kúvi ūni ta'vi utún san ne, í'xí ntí'í un tsi nté ku'u xí'í san.

⁸ Ánjē, ña é kúvi ūví san ne, nakuéku ña trūnpeta ñá di. Kidáā ne, uun nuu i é vāta kaa xuku ka'nu é kai'xi kaá ne, un ntií tsí ko'xó nuu nú ntute ñu'u kán. Uun ta'vi í é kúvi ūni ta'vi ntute ñú'u sán ne, ntūvi níñi.

⁹ Uun ta'vi i é kuvi ūni ta'vi kitī ñú'u nú ntute ñu'u kãn ne, xí'i ntī'i ti ne, í'xi uun tā'vi i é kuvi ūni ta'vi tún ntóó san di.

¹⁰ Ánjē, ña é kuvi ūní san ne, nakuéku ña trūnpeta ña. Kidáā ne, uun xntiví ka'nu sán ne, kó'xō é vē'xí nte e dukún kãn. Kai'xí vatā ó kai'xi chú'ún san. Kó'xō nuu uun ta'vi i é kuvi ūni ta'vi ntute ká'nu sán nī mí kae'nu ntute san.

¹¹ Xntiví san ne, Rkavé nanī. Uun ta'vi i é kuvi ūni ta'vi ntute sán ne, kúrkavē kue'en. Ñá te nté kaa ña'a xi'i ña e xi'i ña ntute é kadāká rkavé san.

¹² Ánjē, ña é kuvi kīmí san ne, nakuéku ña trūnpeta ñá ne, uun ta'vi i é kuvi ūni ta'vi ngántí san ni uun tā'vi i é kuvi ūni ta'vi xoó san nī xntiví san ne, ni'i kuí'i. Uun ta'vi i kúnee é un é un nuu i ne, uun ta'vi i é kuvi ūni ta'vi ntuví san ne, ñá ni xí'í nuu ká ngántí san. Niñú san ne, kuan tsi ō kúvi: ñá ni xí'í nuu ká xoó san nī xntiví san di.

¹³ Kidáā né, da nī kaito ú ne, tēkú ko kaiko uun tadun mé'ñū e dukún kãn ne dá un ntii tsi kākā'an:

—¡Ai! ¡Ña ntá'ví ntu ña'a, ña ntántoo ñuxiví san, te kuēku xtuku trunpeta íña é ūní ka ánje, ña nguii san! —ka'an ti.

9

¹ Ánjē, ña é kuvi ū'ún san ne, nakuéku ña trūnpeta ña. Kidáā né, iní u uun xntivi é kō'xó nte e dukún kãn un tsi nte nú ñu'u kãn. Xntiví san ne, ni'i nta'káá xi'i tótsín san.

² Nākaán ña xi'i tótsín san ne, un vá'a tsi kéne u'me xi'í san, vatā ó kakene u'me ini úrnu ká'nu kue'en. Kūneé ngántí san ni kanī e dukún kan ū'me tótsín san.

³ Mé'ñū u'mé san ne, vé'xī skunti é kaka ti kanii ñūxivi a. Ní'i tī é kué'é ti vatā ó de tdu'me, kiti ió ñū'u a.

⁴ Ká'an ña ni tī é ña ku nant'i ti ite é kae'nu ñū'u a, nté kū'u kuii, nté ūtun di. Da mii tsi ñā'a san kué'e ti ña, tē ña te uve ná'a xteén ña seu Xúva kō.

⁵ Ní'i tī é nanto'o ti ña te ū'un xoo, ntá tsi ña kuvi ka'ní kue'en tí ña. Mí kaxé'e ti ne, kaexnúu vatā ó kaexnúu da kaxé'e tdu'mé san.

⁶ Ntuvi tsikán ne, un vá'a tsi nantuku ñā'a san nté koo kuví ña, ntá tsi ña ní'i ña nté koo. Kuān te un vá'a tsi ntio ña é kuvī ñá ne, ñá nī'i ñá doxi'í san.

⁷ Skuntí san ne, vata ntáa idú kiti tu've i é kī'in ti mé'ñū du'xēn ntáa ti. Díki tī ne, odo é vata ntáa le'e e kúvi kaá kuaan ntáa. Núu tī ne, vata ito nuu ña'a ito.

⁸ Idi ti ne, vatā ó nani idi ñadī'i. Nū'ú ti ne, vata ntáa nu'u ñaña ntáa.

⁹ Uve ata ti tdi'xi e nté kaa te káa kúvi. Dā ntáva ti ne, kakañu'u vata te ntaíta nti'xin ña te da díi kareta e ntáñu'u idú, kiti ntaínu mé'ñū du'xēn san.

¹⁰ Dú'me tī ne, vata ntáa du'me tdú'me ntáa ne, ini xe'e tí di. Dú'me tī san ntée é ntuku kui'i tí ña'a san ū'un xoo.

¹¹ Tō'ó ti ne, divī ánjē, ña e ntée nta'a i totsín san. Abaduun nani é tū'un hébreú ne, Apoliuun nani é tū'ún griegú ne, kani tú'un “é nant'i kue'en”.

¹² É ita ntí'xin é kuvi ūun dóxō. Úvī ká kakunaá ve.

¹³ Kidáā ne, ánjē, ña é kuvi iñú san ne, nakuéku ña trūnpeta ña. Tékú ko uun tatsin í e kí mé'ñū ngimi ntíki san é ōdo nú nāa e kúvi kaá kuaan é ntitsí nuu Xuva ko.

¹⁴ Kídaā ne, kaka'an tátsín san nī ánjē, ña é kui iñu, ña é ni'i nta'a trunpeta:

—Nantuten ngimi ánjē, ña é uve t̄n mí kainu ntute ka'nu é nani Eūfrate —ka'an.

¹⁵ Kidáā né, nāntuté ña ngimi ánjē san é ka'nī ñá uun ta'vi i é kuvi ūni ta'vi ña'á san, tsi é ntoo tú'vē ñá tē xee úra i, ni ntūví, ni xōó, ni kuā.

¹⁶ Kūtuní ko nté kaa sntadun, ña ntántodó idú ne, uvī sientu míñuu ña.

¹⁷ Xée nūú ko idú san nī ña ntántodō t̄i. Sntadún san ne, ntánti'u núu kúñu ñā káa é kaito kuē'é, nī é kuíí, nī é kuāán d̄i. D̄iki idū ñá ne, vata ntáa d̄iki ñáña ntáa ne, kakii ñu'u xú'u t̄i. Ú'me ni dū'xé ñu'u d̄i.

¹⁸ Xí'í uun tā'vi i é kuvi ūni ta'vi ña'á san ntuni núu tsi i: ñu'ú san ni ū'mé san ni dū'xé ñu'ú san e k̄í xu'u t̄i.

¹⁹ Tsí idú san ne, ió ntii t̄i é kuvi ka'ní t̄i ña'a é xū'u xtí ni dū'me t̄i. Tsí du'me t̄i ne, vata kaa d̄iki kóo ne, d̄iví é kantuku kui'í t̄i ña'a san.

²⁰ Ntá tsi ña nguī san, ña é ña ni duku ntée tsikán ne, ñá ni nat̄ivi iní ña kuétsi ñā é ntē ña ni xtuví mii ñā é nuu iní ña é ña vá'ā san ni sántu ñā e kúvi kaá kuaán, nī káa kuí'xín, nī káa kuē'é, ni xūú, ni ūtun d̄i, é ntē ña kaíto, ntē ña katéku i, ntē ña kui kaká d̄i.

²¹ Ntē ña ni nat̄ivi iní ña é kuān tsi o nta'é'ní ña ña'a, e ntáde ña dotatan, e ntáde ña é kini kaa ni ñad̄í'i, e ntadú'u ña d̄i.

10

Ánje ni tūtu lu'nti é k̄atinuú san

¹ Kidáā ne, iní tuku ú uun ánjē, ña dóo ntii iní í ne, vé'xi ñā e dukún k̄ān. Nuú ta'án ña viko; ntee rkuá'nti d̄ik̄i ña. Núu ñā ne, kaxi'í nuu vatā ó kaxi'í nuu ngántií san. D̄í'ín ña ne, vata kaa ntu'u é kai'xi kaa.

² Ni'i nta'a ña ūun tutu lu'nti é kaa ntāa. Dī'ín kua'a ña xtúvi ña nú ntute ñu'u kān né, dī'ín datsin ña ne, ñu'u san xtúvi ña.

³ Un ntii tsi káchu'u ña, vatā ó de ñaña dá kanakiti tī. Dā kúvi kachu'u ñá ne, kātsín u'xé ito.

⁴ Dā kúvi katsin é u'xé ito sán ne, ncho xnteé na'a u é kāka'an, ntá tsi dá iō tu've u é ka'u ú ne, tēkú ko uun tatsin e dukún kān, kaka'an:

—Xnuun xū'un e téku o e kátsin u'xé ito. ¡Ña kū dí xnteen na'an! —ka'an.

⁵ Kidáā ne, ánjē san, ña ntitsi nú ntute ñu'ū sán ni ñū'u a dí ne, nátā'an ntée ña nta'a kuā'a ña e dukún kān.

⁶ Natékū ñá Xuva kō, ña kantíto ntii dañu ntūvi, ña de vá'a e dukún kan ni ñūxiví ni ntute ñu'u ni ūn ntí ntí nee iñá katuví, kaka'an ña tsí ña kukuí ka.

⁷ Kaka'an ña tsí ntuvi dá nakuēku ánjē, ña é kui ū'xé san, trunpeta ñá ne, kuntaa núu i é mii tsi Xuva ko ĩni ñá, vata ō ka'an ñá nī ña dé tsiñu iña ña, ña ntáka'an tú'un ñā.

⁸ Kidáā ne, tátsīn e tēkū ko dí'na ne, kaka'an xtúku nī ko nte e dukún kān:

—Kuē'én, kūki'ín tutu é ni'i nta'ā ánjē sán, divī é nakāa ñá'a, ña ntitsí nú ntute ñu'u kan ni ñū'u a —ka'an.

⁹ Dukuān ne, ñé'ē u mí tuvi ánjē sán ne, íkān ú tutú san. Kaka'an ñá nī kó:

—Ki'in ne, dá kā'xin. Tē é'xin ne, vídin vata ē'xí ntúdin kītume, ntá tsi kuia nūu í'xi o kān —ka'an ña.

¹⁰ Kídaā né, kī'i ú tutú san é ni'i nta'ā ánjē sán ne, ē'xí u. Kuan ē'xi ntí'xe vata ē'xi ntúdin, ntá tsi dā kúvi é'xi ú ne, kuia nūu í'xi ko.

¹¹ Kaka'an ñá nī kó:

—Da mií é k̄a'an ntódon kán ni ūn ntíí ntíí ña'a, ña ntoo dā mí'í ká ñuú, nī ña ntáka'an dá nēé ka tú'un, ni rēi ñá di —ka'an ña.

11

Ña é ūvi ña'a, ña é k̄a'an ntódo tú'un Xuva kō

¹ Kidáā né, tā'xi ña kó uun ntoo kani, vata kaa utun é kī'i kú've núu ō káa ne, kaka'an ñá nī ko:

—Nākuntítsin, kī'in kú'ven úkun Xuva ko nī nú nāa ñá ne, ka'vin nté kaa ña'a ntánuu iní ña Xuva kō má ūkún san.

² Ntá tsi ña ki'in kú'ven kura ukún san, tsí xe'é ña sá'ā é kūvi iña ña'a, ña é ña íni xoo é Xuva kō ne, kaka nuu ña ñuú Xuva ko te ūvi díko uvi xoo.

³ Xu'ú ne, taxnúu ú uvi ña'a, ña é k̄a'an ntódo tú'ūn kó ne, ku'un ña du'nu kúxta úun míil uvi sientu uni díko ntūvi —ka'an ña.

⁴ Ña é uvi ña'á san ne, vata ntáa uvi útun olívu ntáa ña. Vata ntáa tun tsumē é ūvi san e ntāñi núu To'o ñuxiví san ntáa ña.

⁵ Tē xoó ncho ntukū kui'i í ña ne, kene ñu'u xu'u ña ne, koko kue'en. Kuān koo nto'o ña ntaínchu'vi ña.

⁶ Ña uvi ña'á san ne, ío ntii ña é nakādi ñá e dukún k̄an vata koo é ña k̄in dávi da n̄i ntáka'an ntódo ña tú'un Xuva kō. Ío ntii ña é kūvi vií ña é ntūvi niñi ntuté san ne, kuvi vií ña é nantō'o ña ña'a, ña ntoo ñuxiví san, é t̄in ña da nēé ka kui'i vata koo é ntio ña.

⁷ Ntá tsi dā ita ntí'xin ka'an ntí'i ña tú'un Xuva kō né, kēne uun kiti xu'u totsín san é vií tí ni ña du'xēn. Kuvi vií ti ka'ní ti ña.

⁸ Kidáā né, kuntōo mé'ñū kúñu ña itsi mé'ñū ñuú ka'nu san mi náxnteē ñá Tó'o kō ntíkā krusí san. Ñuú s̄a'á ne, vata kaa ñuú Sodomá ni ñūú Egítō kaa.

⁹ Úni ntūvi nte dáva ne, koto ña'a san kúñu ñā, ña vé'xi da mí'i ká ñuú, da nēé ka tatá ña, é da nēé ka tú'un ntáka'an ñá di ne, ñá kuē'é ña itsi é kuntū'xi vá'a ña.

¹⁰ Ña ntántoo ñuxiví san ne, ñá tē nté kaa diní ña tsí xi'í ña uvi ña'á san. Vii ña viko ne, kué'e ñā doméni tá'an ña, tsí ña uvi ña'a, ña é ka'an ntódo tú'un Xuva kō né, dōó nantō'o ñá ña ntántoo ñuxiví sa.

¹¹ Ntá tsi da kúvi uni ntúvi ntē dāvā ne, nantóto xtuku Xuva ko ntuvi ñá'a san ne, nākuiñi ña. Un vá'a tsi ū'ví un ntíí ntíí ña'a san dá ini ña ña.

¹² Kidáā né, tēkú ña uvi ña'á san e dóo ntii kaka'an tátsin é vē'xí e dukún kan ni ñā:

—Ki'xi nto i'a —ka'an tátsin san.

Dukuān ntaíni ña ntaínchu'vi ñá san ne, kúntāa ña e dukún kan mē'ñú vikó san.

¹³ Ūra í tsikán ne, un vá'a tsi taan. Kó'xo uun ta'vi ī é kuvi ū'xi tá'vi ñuú san. Ú'xē míil ñā'a xi'i ñá da ita ntí'xin kúvi taan. Ña'a, ña ntántoo ká san ne, ñá te nté kaa u'ví ña. Da kidáā nanu'u ñá iní ña e dóo ka'nu Xuva kō, ña tuví e dukún kān.

¹⁴ É ita ntí'xin é kuvi ūvi dóxō sán ne, e dóko sā xee é kuvi ūní san ve.

Trunpeta é kuvi ū'xé san

¹⁵ Kidáā ne, ánjē, ña é kuvi ū'xé san ne, nakuēku ña trunpeta ña. Dīto tsí un ntii tsí ntáka'an tátsin e dukún kān:

Un ntíí ntíí ñuú ñuxiví san ne,
kaduku ntée Xuva kō é kadā kú'vē ña,
ntuvi ñá Cristu, ña e táxnūu ña.
Ntii dañu ntūvi é kadā kú'vē ña,
ka'an.

16 Kidáā né, ñatā, ña é oko k̄imi ñá'a, ña ntántoo nú tēu núu Xuva kó san ne, un tsi nákunchiti ntaā ñá nuu Xuva ko é nuu iní ña ña,

17 ntáka'an ña:

Nata'xi ntí sintiá'vi nta'a nto,

Xuvā ntí, ña e dóo ka'nu.

D̄ivi ntō é tuví nto vevíí ne,

d̄ivi ntō kídaā dí ne,

kuan tsi koo kutuvī ntó ntii dañu ntūvi.

Nata'xi ntí sintiá'vi nta'a nto,

tsí e ní'i nto e dóo iō nto é vii ntó ne,

e éni ntu'u nto kadē kú'vē ntó ve.

18 É kūdiin ña ntántoo un ntíí ntíí ñuú san,

ntá tsi é xee ntúvi é kuē'é nto ña é ntō'o ña ve.

E xée ntūvi é kadā kú'vē nto iña ñá ntíxí san ne,

kué'e nto ñā é vā'á, ña dé tsiñu iña nto,

ñā é ka'an ntódo tú'un nto, nī ñā é kā'an náa nto.

Kué'e ntō é vā'á iña ña'a, ña e ntaíko ñu'u nto,

un ntíí ntíí ñá, te kuetsi, te na'nu ña.

E xée ntūvi é nantō'o nto ña'a, ña ntánat̄iví ñuxiví san,

ka'an ña.

19 Kidáā né, nākaán xi'i úkun Xuva kō é tuví e dukún k̄an ne, iní i k̄an ne, d̄ító tuví etun mí ñu'u vá'a lei Xúva kō. Kidáā né, dōó kaxi'í nuu. Dōó kakatsín d̄i. Dōo d̄ító tatsín san. Dōó katáan d̄i. Un vá'a tsi kak̄in davi xuú d̄i.

12

Uun ñad̄í'í, ni k̄iti ña vá'a, k̄iti u'xe d̄iki i

1 Kidáā né, k̄i d̄ító uun e dóo ka'nu e dukún k̄an. Ik̄an ntitsí uun ñad̄í'í, nuu tá'an ña ngántií ne, xóó sán ne, ntekú nti'i d̄í'in ñā ne, le'e é kuvá'a é ūxuví xnt̄iyi ntekú d̄iki ña.

2 Ñu'u i'xá ña ne, kakachu'u ntáa ña é kaexnúu í'xi ña, tsi dokó sa káku i'xá ña.

3 Kidáā né, kīi ká xtuku uun nuu i e dukún kán. Iní u é ntĩtsí uun kiti ña vá'ā, teku ku'e ti, é ũve u'xe díki ti ni ũ'xi ntĩki ti. Kuān o ntántídó le'e san xé un xé un díki ti.

4 Dú'me xtī dita núu ti uun ta'vi ī é kuvi ũni ta'ví xntiví san ne, náko'xó nuu ti nte ñuxiví a. Kidáā ne, íntĩtsí kiti ña vá'ā san nuu ñadi'í, ña dokó sa káku i'xá i. Ntĩtsí nteē ti i é ká'xi tí i te káku.

5 I'xa é nakáku ña ne, i'xa tii é kadā kû've un ntĩí ntĩí ñuu, é kuni'i nta'a tātun i e kúvi káa. Ntá tsi Xuva kō ne, nakí'i ña i'xá san é kūtuví ni ña nú tēu ña.

6 Ñadĩ'í san ne, ĩnu ña, kue'en ñá ñuu itsi mí xtúvi tū've Xuva kō mí kutuví ñá, mí kuēnta víi ña ña uun míil ũví sientu uní díko ntuví.

7 Kidáā ne, kúvi du'xēn e dukún kán. Ánje ña odo nūu, ñá nani Mĩgee, dívi ña ni un ntĩ'í ánje ñā ne, náā ñá ni kiti ña vá'ā san. Kiti ña vá'ā sán ni un ntĩ'í ánje tī ne, un vá'a tsi náa ti ni ñā,

8 ntá tsi ña ni kuvi víi ti. Ñá ni nĩ'i mí kuntōo ká ti nĩ ánje tī e dukún kán.

9 Dukuān ne, náko'xó ña kiti ña vá'ā san, kiti itúvi nte ntúvi dí'na, kiti é nanĩ diablu, tó'ō e ña vá'ā san. Dívi tī é Satanaa náni ti di, kiti kaeni nta'ví ña'a dá kanĩ ñūxiví san. Náko'xó ña ti ni un ntĩ'í ánje ti ũun tsi nte ñūxiví a.

10 Tékú ko tsí un ntii tsi káka'an tátsín san nte e dukún kán:

E xée ntúvi é nakákú Xuva ko ko vē.

E xée ña e dóo ntii iní ña é kadā kú've ña.

Cristu, ña táxnūu ña ne, kodo núu ña é un ntĩ'í vē.

Tsi é nakó'xo nteē ña kiti katsi'í kuétsi ta'an ko nta'a Xuva ko ntē ntúvi ntē níñu.

11 Kūvi idé ta'an ko sán nĩ e ña vá'ā san

kuenta iña níñi é etí A Le'ntú san,

ni kuēnta iña tú'ūn é nuu é ntaā i e ntáka'an ñá,

tsi ña ni de víni ña ntuvi iña ña,
kuān te na kuví ña.

¹² Kuntōo díni ntó ve, e dukún kan,
ni un ntí'í ña ntántoo ikān.

Ntá tsi ña ntu ntá'vi ide nto,
ña ntántoo ñuxiví san nī nú ntute ñu'u kān,
tsí e ntí tó'ō e ña vá'ā san mí ntoo nto ve.
Un vá'a tsi kakudiin,
tsí ini tsí ña na'á ka kutuvi,
ka'an tátsín san.

¹³ Dā íni kiti ña vá'ā san tsí nakó'xo ña ti ñuxiví a
ne, íntīkin tí ñadī'í, ña nakāku i'xa tíi san.

¹⁴ Ntá tsi ñadī'í san ne, ni'í ña uvi ntí'xin tādun
ka'nú san é ntāva ña, ki'in ña ñuu itsí kān, mi dóo
ikā mí tuví kiti ña vá'ā san. Ikān ne, ní'í ña é kā'xi
ñá uni kuia nte dáva.

¹⁵ Kiti ña vá'ā sán ne, tāvá ti ntute xu'u ti é vata
kaa ntute ka'nu kaa vata koo é kī'in ni'í ntuté san
ñadī'í san.

¹⁶ Ntá tsi xntíi ñū'ú san ñadī'í san, e nántika ñū'u
sán ne, íkan kūntíi ntute ka'nu san e táva kiti ña vá'ā
san xu'u ti.

¹⁷ Dukuān né, kūdiin kué'en kiti ña vá'ā sán ni
ñadī'í san. Ntaka ti ikān ne, dá kué'en ti é vii tí
du'xen ni i'xā ñá, ña nguī san, ña ntáde ntaa é
kāka'an Xúva kō, ña ntántīkin Jésuu.

13

Úvi kiti dóo donchu'vi ntáa

¹ Ntítsí u nú ñuti diñi ntute ñū'u san, íni u kéne
ntita úun kiti e dóo donchu'ví kaa mé'ñu ntute ñu'u
kān, kiti uve u'xe díki í ni ū'xi ntíki í. Kántídó le'e é
un é un ntíki ti. Uve na'a díki ti e dóo kiní ó kaka'an
kuénta iña Xuva ko.

² Kiti dóo donchu'ví kaa, kiti é íni u sán ne, vata
kaa ñaña tekú kaa ti. Ntá tsi dí'in tī ne, vata ntáa

dí'in oso ntáa ne, xu'u ti ne, vata kaa xu'u ñaña kaa. Kiti ña vá'ā sán ne, xé'e ti ntii tī é ntēē kimi tī. Xé'e ti tēu ti mí tuyí ti é vii tí tsiñu ka'nu.

³ Kiti dóo donchu'ví kaa sán ne, vata tē ni'i kuí'i kue'en úun diki ti, ntá tsi é ntuvá'a. Un ntíí ntíí ña'a, ña ntántoo ñuxiví san ne, ntántikin ñá ti, tsí koo da kúdu'va ña é ntuvá'a diki ti.

⁴ Ntánuu iní ña'a san kiti ña vá'ā san, tsí xe'é ti ntii ti kiti dóo donchu'ví kaa san vata koo é kuvi kada kú'vē ti. Ntánuu iní ña'a san kiti dóo donchu'ví kaa san ne, ntáka'an ña:

—¿Xoó ntu é vata kaa kiti dóo donchu'ví kaa san? ¿Xoó ntu kuvi vii i é nāá ni tī? —ka'an ña.

⁵ Ní'i tī ítsi e dóo ka'nu víi tī, e dóo kini koo ka'an tí ña Xuva ko. Ní'i tī é kadā kú'vē ti uvi díko uvi xoó ne,

⁶ kuan ō dé ti. Dóo kini ka'an tí ña Xuva ko ni e dukún kán mí tuví ña, nī ña ntántoo ni ña ikán.

⁷ Ní'i tī é vii tí du'xen nī ña ntántikin Xúva kō né, kūvi idé ti ni ña. Ní'i tī é kadā kú'vē ti ña un ntíí ntíí ña'a, ni ūn ntíí ntíí tātá ña'a, ni ūn ntíí ntíí ñuú, ni ūn ntíí ntíí ña'a, ña ntáka'an dá nēé ka tú'ūn.

⁸ Un ntíí ntíí ña'a, ña ntántoo ñuxiví san ne, ínūu iní ña kiti dóo donchu'ví kaa san, ña é ña ni uvé na'a dívi i tutú A Le'ntu é xi'í un tsi nte da ñi ntú'u ñuxiví san, tutú mí uve na'a xoo e ní'i i ntuvi ña i ntii dañu ntúvi.

⁹ Te ínín é kīnin ne, kinin.

¹⁰ Tē xoó ni'i i é kunuu kutū né, kunuu kutu ntí'xe. Tē xoó ni'i i é kúví nuu káa ne, kāá kuví nuu ña. Dukuān né, xo'ō e ntáduku ntée o Xuva kō ne, ka'nu vii ó nima kó ne, kunūu ini ko ñá dī.

¹¹ Kidáā né, íní xtuku u úun kiti e dóo donchu'ví kaa. Kiti sá'á ne, ñu'u san kakéne ti. Uve uvi ntíki ti é vata kaa a le'ntú kaa ti, ntá tsi kaka'an tí vatā ō kaka'an kítí ña vá'ā san.

12 Ní'í tì ĩtsi é kadā kú'vē tì naa i kítì kuvi ūun san dá ntoo dadì tì. Kade tì é un ntíí ntíí ña'a, ña ntántoo dá kaníí ñuxiví san, kunuu iní ñá kítì kuvi ūun san.

13 Dōo ini tì nté koo víí tì é kōo dá ntákudū'va ña'a san. Un tsi nte kúvi nak̄in tì ñu'u é ka'xi nte e dukún kan ní dukuān ntaíto dító ña'a san ñuxiví a.

14 Kuenta iña i sá'ā é nī'í tì e kúvi idé tì dá kade tì tsiñu kítì kuvi ūun sán ne, kaeni nta'ví tì ña'a, ña ntántoo ñuxiví sa. Kaka'an tì ni ñā'a san é na ntāvá'a naa ñá santu kítì kuvi ūun, kítì idó nuu káa dīkí i, ntá tsi ntuvá'a tì ne, kantító dukuan tì.

15 Ní'í tì é kúvi kué'e tì ntuvi iña santu e ntúvá'a naa kítì kuvi ūun sán ne, ĩde tì é kúvi ka'an sántu sán di. Kaka'an tì tsí da xōó ka ña'a, ña é ña kanúu iní i santu, kítì kuvi ūun sán ne, na kuví ña.

16 Taxnūu tì é na kūvé na'a seú san nta'a kua'a ña ne, ō xteén ña, un ntíí ntíí ña'a san, te kuetsi te na'nu ña, te kuika ñā, te nta'vī ñá, te ĩó tó'lo ña ne, ō iña mii ña ntáde tsiñu ña.

17 Nté uun xoxo kuvi díko i, ntē ña kuvi kuiin í, tē ña te ntée na'a seú san kúñu ĩ. Seú san ne, dīvī kítì é kuvi ūun sán, ō numéru dīvī tì.

18 Sá'ā ne, ntio é koto ntuu ō. Xoo é ki'in iní í ne, na naka'vi ñā numéru kítì kuvi ūun san. Numéru sán ne, kaduku ntée uun dīvī ña'a, ña ntoo ñuxiví sa. Te nakua'a ō numéru dīvī ñá ne, iñū sientu uni díko iñu.

14

Nchu'un e ĩta ña'a, ña uun sientu uvi díko kimi míl ña'a

1 Kidáā né, ĩnī u ntitsi A Le'ntú san tì'í í xuku Siuún, ní ūun sientu uvi díko kimi míl ña'a, ña é ntée na'a xteen i dīvī A Le'ntú san ní dīvī Uva ĩ. Dadì tsi ntāñi ntíí ntíí ña.

² Kidáā né, tēkú ko é vē'xí nte e dukún kan vatā ó kakañu'u ntúte ka'nu, vatā ó kuvi dá kakē'xén nuu da dóo ntii kakatsin, vatā ó kuvi da dóo titín ña'a ntánakueku ña kiñú'ū.

³ Ita ña uun nchu'ún xee nú tēu Xúva ko, nī ngimi kiti ntantító sán ni ñatā sán di. Nté uun ña'a ña ni kuvi kutú've ña nchu'ún xee san, tsí da mii tsi ñā'a, ña é uun sientu uvi díko kimi míil ña'a, ña é nakáku, ña ñu'u ta'an ñuxiví a, kuvi ita ña.

⁴ Ña sá'á ne, ña ni ide ña kuētsi ni ñadī'i, tsi ntúntoo ña. Ntántikin ñá A Le'ntú san da mí'i ka mí kī'in ña. Nakáku ña mé'ñū ña ntoo ñuxiví sa é kuvi ūun nuu i doméni iña Xuva ko nī A Le'ntú san.

⁵ Nté uun dovete ña ni ká'an ña, é ntē ña tuvi kuētsi ña nūu Xuva ko.

Ánjē, ña uni ñá'a, ña ni'i tú'ūn

⁶ Kidáā né, iní xtuku ú uun ká ánjē, ña kaiko mē'ñū e dukún kán ne, e ní'i ñā tú'ūn e dóo va'á ntii dañu ntūvi é ká'an ntodo ñá nī ña ntoo ñuxiví sa, ña dā mí'i ká ñuu, é da nēé ka tu'ún, da nēé ka tatá ña.

⁷ Un ntii tsī kéne ña, kaka'an ña:

—Kuiko ñu'u nto Xuva kō ne, kada ka'nu nto ña. Tsí e xée ura i é kadā kú've ñá kuenta iña ña'á san. Kunuu iní ntó ña di, tsí ñi ñā de vá'a ña e dukún kan ni ñuxiví sa, ni ntute ñu'u kán, ni ūn ntíí ntíí ntute kuíi é kākene ñu'u sán di —ka'an ña.

⁸ Kidáā ne, xée ánjē, ña é kuvi ūví san, kaka'an ña:

—¡E kó'xō nuu, e kó'xō nuu ñuú ka'nu Babilonia, é ide ki'vi un ntíí ntíí ñuú san ni vīnu i é kīni kaa! —ka'an ánjē san.

⁹ Kídaā ne, xée tūku ánjē, ña é kuvi ūní san ne, un ntii tsī kéne ña, kaka'an ña:

—Tē xoó ña'a kanuu iní ña kiti san ni sántu tí ne, kaxé'e ña xteén ña o nta'a ña é kunteé na'a káa tí ne,

10 kudiin kué'en Xúva ko ni ñā. Ñá ntuntá'ví ini ña ñā nté un sín. Kué'e ña ñā é ntō'o ña é kōko ña ñu'u du'xe san nuu ánje ni nūú A Le'ntú san.

11 Ú'mē é kākene mi ntánto'o ña ne, kuan tsí koo kené ntii dañu ntūvi. Ña'a, ña é kānuu iní i kití san ni sántu tí, ña é ntēe káa tī xteen í ne, ñá nī'i ña é kū'un kadin ñá ntē ntūvi ntē níñu —ka'an ña.

12 Dukuān né, ña'a, ña ntáduku ntēe Xuva kō san, ña ntáde ntaa é kāka'an ña, ña ntákuinti'xe i Jesuu ne, kantio e dóo ka'xi vii ñá nima ña.

13 Kidáā né, tēkú ko é kāka'an tatsín san nī ko nte e dukún kān:

—Xntēen na'an sá'ā: “Nté kui vá'a ña'a, ña xi'i e kuínti'xe ña Xuva kō.” Kuan koo xntēen —ka'an.

—Vá'ā ó —ka'an Espíritū Sántū san—, tsí kuntoo da'na ña; ña káda tsiñu ká ña, tsí ki'in ní'i ña nuu i é vā'á o dé ña ñuxiví a —ka'an ña.

Ntūvi é nakuitā ñá ña'a san ñuxiví san

14 Kidáā né, iní u uun viko kui'xin. Nú vīkó san tínti'i uun é vata kaa ñatíi kaa. Ntekú le'e e kúvi kaá kuaan diki ñá ne, ní'i nta'a ña ūun káa dakua e dóo ntikō.

15 É tūku ánje kíi ña ini ukún san ne, un ntii tsi kāka'an ñá nī ña tuví nú vīkó san:

—¡Kadan tsiñun ni'in káa dakuá o ve! tsí e xée ntūvi é nakuidon, tsi dóo itsi kití kii ñuxiví san —ka'an ña.

16 Kidáā ne, ña é tuví nú vīkó san ne, nátāntée ña káa dakuá ña ne, eni ntu'u ñā nákuído ña kití itsí san.

17 Kidáā né, kíi tuku ánje ini ukun é tuví e dukún kān, ní'i ña káa dakua e dóo vá'a ntikō.

18 Kíi xtuku ánje nú nāá san. Ánje, ña sá'á ne, nteé nta'a ña ñu'u. Un ntii tsi kāka'an ñá nī ánje, ña é ní'i káa dakua e dóo ntikō san:

—¡Natāntéen káa dakuá o! Nakuidon xo'o tinti'ō san, tsi dóo itsí ti —ka'an ña.

¹⁹ Ánjē sán ne, nátāntée ña káa dakuá ña ñu'u a ne, kátsin ña xo'o tinti'ó san. Tsū'un ña ti iní tun ntōó Xuva kō é kādin ñá ti. Sá'a kāni tú'un é nanto'o Xuva ko kō.

²⁰ Kiti tinti'ó san ne, ĩxkádin ña tī nte díñi ñuú san ne, nté kaa te niñi dóo kí tun ntōó san. Ē'nu un tsi da nté xēe nú xo'o xu'u idú san ne, vata kaa ntute ka'nu kaa e xee tá'an nte uní sientu kilumétru é kā'nu.

15

Ú'xē ánjē, ña é ni'i u'xe núu i é ntō'o ña'a

¹ Iní u e dukún kān uun ká tuku nuu i e dóo ka'nu kue'én ne, un tsi kúdu'va iní ko dá iní u. Iní u u'xe ánjē, ña é ni'i u'xe núu i e dóo nto'o ña'a san. Ña kōó ká nuu i é nto'o ña'a san te ĩta ntí'xin nuu i sá'ā, tsí ikān xee tá'an mí ntí'i é kūdiin Xúva kō.

² Iní u uun ntute ñu'u é vata ito xūxu é kāxi'í ni'ni é kadāka ñú'u. Ntāñí ña'a nú ntute san, ña e kúvi idé ni kīti san ni sántu tí, nī káa ti nī numéru dīvī tí di. Odo ñā kiñú'ū é xe'é Xuva ko ñā.

³ ĩta ña nchu'ún vatā o ĩta Muisee, ña dé tsiñu iña Xuva kó ne, vatā ó nchu'ún A Le'ntú san di. Sá'ā ntaíta ña:

Dōo ka'nu ne, dōo vá'ā ó un ntí'i nuū i é kade nto.

Da ntákudu'va ntí nuu i é kade nto,

Xuvā ntí, ña e dóo ió ntii ī é vīi da nēé ka.

Itsi nto ne, itsi ntaa, itsi é nuu é ntaā i.

Dīvi ntō Rei da mí'ī ká ñuu.

⁴ ¿Vá iō ntú xoo é ña káú'ví i nto, Xuvā ntí?

¿O iō ntú xoo é ña ká'an i e dóo ka'nu nto?

Tsí da mii xntō é vā'á nti'xe nto.

Xēe ñā'a da mí'ī ká ñuu é kāda ka'nu ña nto.

Tsi d̄to e d̄o v̄á'ā ó kade kú'v̄e nto,
kuan ō íta ña.

⁵ Kidáā né, íní u é k̄ántii ini ukún Xuva kō e dukún k̄ān mi d̄o xii, mí ñū'u v̄á'a lei ña.

⁶ Nt̄ii u'xe án̄jē san má ūkún k̄ān, ña ni'i u'xe núu i é nt̄o'ō ña'a san. Ñū'u ña doo nt̄ii e d̄o va'a, é un tsi kai'xi kai'xi sa. Kat̄īnuu doo e kúvi kaá kuaan xk̄íntika ña.

⁷ Kidáā ne, uun kiti é kuvi k̄imi kiti ntant̄ito sán ne, xé'e ña ūun e'xin e kúvi kaá kuaan dá un dá un án̄jē, ña é ū'xé san. Ñū'u tsitu ē'xin san núu i é nt̄o'ō ña'a é v̄é'xí nta'a Xuva kō, ña kant̄ito nt̄ii dañu nt̄ūvi.

⁸ Ñū'u tsitu ini ukún san u'me é v̄é'xí nta'a Xuva kō, ña e d̄o ka'nu, ña e d̄o nt̄ii iní i. Nté uun xoxo kuvi kí'vi i má ūkún k̄ān da nté nt̄í'í é ū'xe núu i e d̄o nt̄o'ō ña'a san é ni'i án̄jē, ña é ū'xé san.

16

E'xin é ñū'u é nt̄o'ō ña'a san nta'a Xúva kō

¹ Kidáā né, t̄ékú ko tsi d̄o nt̄ii k̄āka'an tátsín san nte ini ukún k̄ān, kaka'an ni án̄jē, ña u'xe ñá'a san:

—Kue'ēn nt̄ó, k̄ukáte nto nuu i e d̄o nt̄o'ō ña ñuxiví san é ñū'u ū'xe é'xin san ñuxiví k̄ān —ka'an tátsín san.

² Kué'ēn án̄jē, ña é kuvi ūun sán ne, ēté ña é ñū'u e'xin ña ñuxiví k̄ān. Un nt̄í'í nt̄í'í ña'a, ña é nt̄éé na'a káa k̄í'í san kúñu i n̄i ña nt̄ánuu iní i santu t̄í ne, k̄ēne t̄intu'xe e d̄o kini nt̄áa kúñu ñā ne, un v̄á'a v̄á'a tsi exnúu.

³ Ánjē, ña é kui ūví san ne, ēté ña é ñū'u e'xin ña nú ntute ñū'u k̄ān ne, ntute sán ne, nt̄ūvi niñi v̄áta ito niñi ñá xi'i itō. Xí'í nt̄í'í nt̄í'í kiti ñū'u nt̄o'ō iní ntute ñū'u k̄ān.

⁴ Ánjē, ña é kui ūnī san ne, ēté ña é ñū'u e'xin ña nú ntute ka'nu kan nī mí kaē'nu ntute sán ne, ntuvi niñí dī.

⁵ Kidáā né, tēkú ko tsi ánjē, ña nteé nta'a i ntute sán ne, kaka'an ña:

Dōo vá'ā ó kade kú'vē ntó, Xuvā nti.

Dōo va'á kue'en nto,

nto'o é tuví nto veví ne,

tuví nto kídaā dī.

⁶ Tsí divi ñā éti ña niñi ña'a,

ñā ntáduku ntée nto,

ni ña'a, ña é kā'an ntódo tú'un ntō.

Veví ne, nakō'o nto ña niñi,

tsí mii ñā ntúku ñā é kuān koo víi nto ni ñā,

ka'an ánjē san.

⁷ Tēkú xtuku kó uun tatsin é vē'xi nú nāa kan, é kākā'an:

—Kuan koo, Xuvā ntí, ña e dōo ntii inī i, tsi dōo vá'ā ó kadē kú'vē nto é nuu é ntaā i —ka'an.

⁸ Ánjē, ña é kui kīmí san ne, ēté ña é ñū'u e'xin ña nú ngántíi san ne, ní'i ĩtsi é kā'mi ntúve i ña'a san.

⁹ Un vá'a tsi í'xi ñá'a saṅ é xe'é ka'ni kuē'en ngántíi san. Ntá tsi ñá ni náti vi iní ña, ntē ña ni ká'an ña te dōo ka'nu Xuva kō. Ká'an kīni ña iña Xuva ko, tsí divi ñā e táxnūu ña é ntō'o ña.

¹⁰ Ánjē, ña é kui ū'ún san ne, ēté ña é ñū'u e'xin ña nú tēu kiti dōo donchu'ví kaa san ne, kūnee mí kadē kú'vē ti. Ña'a sán ne, un tsi náka'xí ta'an ña nú'u ñā e dōo ntánto'o ña.

¹¹ Ntá tsi dā díi díi ka ntáka'an kīni ña iña Xuva ko, ña tuví e dukún kān, tsi dōo ntánto'o ña e ntáte'u ña tĩntu'xé san. Ntē ña ni náti vi iní ña nuu ī e ntáde ña.

¹² Ánjē, ña é kui iñú san ne, ēté ña é ñū'u e'xin ña nú ntute e dōo ka'nu san é nani Eūfraté ne, ĩtsi nūu

ntute san vata koo é kūvi kuita ntí'xin rei, ña ntáde kú've ñuu é ntoo mí ka'nu ngántií san.

¹³ Kidáā né, iní u tsi kíi uní espíritū é kīni ntáa san xu'u kiti ña vá'ā sán ni xū'u kiti dóo donchu'ví kaa san, ni xū'u ña kaka'an é tū'ún Xuva ko kaka'an ña, ntá tsi ña ntáa. Vata ntáa tsá'vā ntáa espíritū é kīni ntáa e kíi xu'u ña.

¹⁴ Vé'xi ntā'a tó'ō e ña vá'ā sán ne, kade nuu i é kōo da ntákudu'va ña'a san. Kí'ín mí ntoo un ntíí ntíí rei ñuxiví san vata koo é nakūvé ta'an ña é vii ñá du'xen ni Xuva kō, ña é kuvi vii é un ntí'í. Dóo ka'nu kuvi ntuvi tsikan.

¹⁵ “Koto nto tsí da nées iní xntó ki'xi ú vata koo ki'xi uun ña du'u. Nté kui vá'a ña'a, ña é ña te ntákidi, ña é iō tu'vé doo i vata koo é ña kuká'an nuu ña é kīni ña'a san é kuntíí ña”, kuan ō ka'an Xúva kō.

¹⁶ Ne, nataká nuu reí san ñuu é nani Armagēduun é tū'un hébreu.

¹⁷ Ánjē, ña é kui ū'xé san ne, ēté ña é ñū'u e'xin ña mé'ñū tatsín san ne, nte nú tēu ka'nu é tuví ini ukun e dukún kán ne, un ntii tsi kaka'an úun tatsin é kaka'an:

—jÉ kūvi ve! —ka'an.

¹⁸ Kidáā ne, iñi ntú'ū xi'í nuu ne, kātsín di. Dōo káñu'ú ne, un ntii tsí taán ñuxiví a. Nté uun ito vata táan yata ō kúvi sá'a nte ntúvi é ntoo ña'a ñuxiví a.

¹⁹ Ñuú ka'nu sán ne, ntíka. Uní tá'vī kúvi. Un ntíí ntíí ñuu dá kaníí ñuxiví sa ne, nūu dí ne, naka'an Xuva ko ñūu ká'nu é nani Babiloniá ne, díi ka kue'e xe'é ña é ntō'o ña; un vá'a tsi kúdiin ña ni ñūú tsikan.

²⁰ Ntoko ñu'u un ntíí ntíí ñuu é ōdo ntita mé'ñū ntute ñu'u kán né, kūnaá un ntíí ntíí xuku.

²¹ Un tsi nte e dukún kan vē'xi kún davi xuu é ña te da va ntáa, é vii te ūvi díko kílū é un é un, é kō'xó

ntōdó ata ña'á san. Ne, dōó ka'an kīni ña'a san iña Xuva ko kuenta iña dávi xuú san, tsi dóo donchu'ví o kúvi e ntó'o ña'a san.

17

É nto'o ñadī'í kini kaa

¹ Kidáā ne, uun ánjē, ña é ū'xe ña'a, ña ní'i ū'xe é'xin sán ne, xée ñā mí tuví u ne, kaka'an ñā nī ko:

—Ni'ín, nañē'e ú o nté koo nto'o ñadī'í kini kaa san, ña tuvi mé'ñu ntūte na'nu san.

² Un ntī'ī rei ñuxiví san idé ña ni ñā é kīni kaa. Ná te nté kaa dé kí'vi ña vīnu ña —ka'an ña.

³ Kidáā né, nuu ta'án u xénī kó, kue'en ni'i ñá ko ñuu itsí kán. Ikán né, íni u uun ñadī'í, ña ntekú kiti kuē'e, kiti dóo donchu'ví kaa. Uve u'xe díki ti. Ú'xi ntīki ti dí ne, kanī kúñu ti ūve é kāka'an kīni iña Xuva ko.

⁴ Ñadī'í san ne, nuu ña doo kué'e tekú níñi, é kaito nteē di. Nu nenu ña xo'o kiti ni tsintí ni dī'i e kúvi kaá kuaan, e kúvi xuú e dóo kai'xi ni kiti ku'xin e dóo nuu á'vi i sán di. Ni'i nta'a ña e'xin e kúvi kaá kuaan é ñu'u tsitu nuū í e dóo kini ntáa é kade ña ni da neé ka ñatīi, nuu i e dóo dentu.

⁵ Xteén ña ne, nteé na'a úun dī'ví e dóo vi'xín ō, é káni tú'un: “Babilonia ká'nu, é ñivi di'i ñadī'í kini ntáa ni ūn ntīí ntīí nuu i é dentu é iō ñuxiví san”, nteé xteen ña.

⁶ Kidáā né, kūtuní ko tsí ñadī'í tsikán ne, kí'vi ñā e xí'i ñā niñi ñá'a, ña ka'an ntódo tú'un Xuva kō, ña é kā'an tú'un Jēsuu.

Kóo dā kúdu'va ko dá íni ú ña.

⁷ Ntá tsi kaka'an ánjē san ní ko:

—¿Nté kui koo da kákudu'va ntu o? Vi'a ve ne, ka'án u ni ō nuu i e dóo vi'xín ō iña ñadī'í sa'á ní

kīti ntekú ña san, kīti dóo donchu'ví kaa é uve u'xe díki tí ni ū'xi ntīki ti.

⁸ Kīti dóo donchu'ví kaa, kīti ínin sán ne, ítūvi ti kídaā, ntá tsi xoó ka tí vevii. Ntá tsi nene díto xtúku ti xu'u totsín san di'na dá kī'in ti é nakūnaá kue'en ti kúñu ti ntii dañu ntūvi. Ña ntoo ñuxiví san, ña é ña túvi dívi ī nteé na'a iní tutu mí ūve na'a dívi ña'a, ña é ni'i i ntuvi iña i un tsi nte dá de kú've Xuva ko ñuxiví san ne, kóo da kudū'va ña te íni ña kīti san, tsí ítúvi ti kídaā ne, xoó ka tí vevii, ntá tsi ntii díto xtúku ti.

⁹ 'Ta é ntio é kī'in ini ō sá'a vē: É ū'xe díki tí ne, kani tú'un ū'xe xúku mí tuví nti'i ñadī'í san.

¹⁰ Kani tú'ūn é ū'xé reí di. Rei, ña é ū'un san ne, é ngāva ña. Uun ña ne, vevii kadē kú've ña. Ña uun ká san ne, vata kí'xi ñā. Ntá tsi te vē'xí ña ne, ñā kukuīí ña kutuvi ña.

¹¹ Kīti san, kīti ítúvi kídaā ne, xoó ka tí vevii ne, dívi ti vii tí rei é kui ūná san ne, kaduku ntée ti é ū'xé reí san di. Rkontúvi ne, kí'in tī é nākunaá kue'en ti kúñu ti ntii dañu ntūvi.

¹² 'Ntīki é ū'xi é ínin sán ne, dívi é kani tú'un ū'xí rei, é vāta kuiñi ntu'u kada kú've ña. Vii dadīi ña rei ni kīti san, ntá tsi uun da'na tsi.

¹³ Un tsi ntáda ña xu'u ña é kuē'é ña ntii ña ni tsīñu ña kīti dóo donchu'ví kaa san é kadā kú've tí naa ña.

¹⁴ Vii ña du'xen ni A Le'ntú san, ntá tsi ña kivi vii ña ni ī, tsí dívi é kūvi vii. Tsí A Le'ntú san ne, dívi e Tó'o ūn ntīí ntīi tó'o ñuxiví sa, dívi é Rei, ña é díi ka ka'nu é da nēé ka tuku rei. Ña ntántikin i, ña é kana, ña é nakaxnúu ne, ñā natīvi iní ña é kuntikin ñā A Le'ntú san —ka'an ánjē san.

¹⁵ Kaka'an xtúku ánjē san ní ko:

—Ntute ka'nu é ínin, mí tuví nti'i ñadī'í kini kaa sán ne, dívi é kani tú'un e dóo tītín ña'a, ña vé'xi dā

mí'í ká ñuú é da nēé ka tu'un ntáka'an ña.

¹⁶ Ntíki é ū'xi é inin é ūve kiti sán ne, kinchu'vi ñádí'í kini kaa san. Xtuvī mii ña é kōo da kantí ña. Ka'xi kúñu ña ne, ka'mi ña di.

¹⁷ Tsí Xuva kō ne, xé'e ña ĩtsi reí san é vii ñá nēe é ntio ña. Xé'e ñá é un tsi ntáda ña xu'u ña é kué'é ña é kadā kú've kiti san náa ñá da nté ku é kūntaa ntí'í é káka'an Xúva kō.

¹⁸ Ñádí'í, ña é inin sán ne, ðivi ñuú ka'nu é kadē kú've iña un ntí'í ntí'í rei ñuxiví san —ka'an ánjē san.

18

Dā ko'xó nuu ñuú Babilonia

¹ Dā ita ntí'xin kúvi sá'ā né, ĩní u tuku ánjē, ña vé'xi e dukún kán, ña e dóo ntii iní i. Xí'í nuu kaní ñuxiví san, tsi dóo kai'xi ntúve ña.

² Un ntii tsí kéne ña, kaka'an ña:

—jE kó'xo ñuú Babilonia, ñuu e dóo ka'nu san! É kūvi ví'i é ña vá'a vē, mí ñu'u vá'a un ntí'í ntí'í espíritū é kīni ntáa, ni tāka mí ñu'u vá'a un ntí'í ntí'í láa ku'u, kiti dóo dentū.

³ Tsí un ntí'í ntí'í ñuú san ne, de ki'vi ña ni vīnu i é kaēni dikí ña da xōó ka ñatī. Rei, ña e ntádē kú've ñuxiví san ne, ēni dikí ña ñádí'í san di, nī ña ntádiko nu á'ví ñuxiví san ne, kukuika ñā, tsi dóo ñíí ña da nēé ka e ntío ña —ka'an ánjē san.

⁴ Kidáā né, tēkú xtuku kó uun tatsin é vē'xí e dukún kán, kaka'an:

—Ntii nto ñuú sa'á, ña'a ko, vata koo é ña dúku ntée nto é vii nto é kīni kaa e ntáde ña, vata koo é ña ní'i nto é nto'o nto ni ñā di.

⁵ Tsi kuétsi ñā ne, é kūxee kuitin un tsi nté e dukún kán. Tsí Xuva kō né, naka'an ña nuū i é kīni kaa iña ña.

⁶ Naku'é e nto un ntí'i vata tsi ō tá'xi ña nto. Ntá'vi nto ūvi íto vatā o dé ña ni ntō. Ūvi íto nadaká nuu nto vata koo é na kuntii inī i é kō'o ña, vata ō nádaká ña e xí'i ña'a san.

⁷ Kué'e ntō é na ntō'o ña ve; na kūnta'xa iní ña vata tsí o dé ka'nu ña, vatā o itúvi ña nī dokuika íña ñá di. Tsí kaka'an míi ña: “Xu'ú ne, dōó ka'nu ña'a u é reiná u. Ñá te ñadī'i kíi u; ñá te ñadī'i ntâ'ví u; nté un sín ña te neé nto'o ko”, ka'an ña.

⁸ Dukuān ne, uun ntúvi tsi xee ntíi ntī é ntō'o ña. Xéē doxi'í, nī dontîní, dōkó di, nī é koko ña mé'ñū ñu'ú san di. Tsi dōó ka'nu Xuva kō, ña kade kû've —ka'an tátsín san.

⁹ Rei ñuxiví san, ña éni dikí ñadī'í san ne, ña é intóo dadīi ni ña nī e dōó va'á íña ñá ne, kueku nteé ña ña, tsi dōó u'vi kivi ña ña te íni ña u'me é kākene mí kai'xi ñádī'í san.

¹⁰ Kuntāñi ika tsi ña, e ntaú'vī ña é ntō'o ña e dōó kanto'o ñadī'í san. Ká'an ñā:

—¡Ña nta'ví idēn ntun, ñuú Babilonia, ñuu e dōó ka'nu kue'en! É uun da'na nchūvii dú'va tsi xee e dōó nto'o o —ka'an ña.

¹¹ Ña ntádiko nu â'ví ñuxiví san ne, kueku nteé ña i. Kuntōo nta'xa ña, tsí ña xoxó ka ña'a, ña é kuīn íña ña ve.

¹² E diko ñā né: kāá kuaan, kāá kuī'xín, ni xūu e dōó nuu á'vi i, ni kīti kuī'xín, ni dōo ntíi, ni dōo kaíto nteé, ni dōo séda, ni dōo kue'é tekú níñi, ni ūn ntíi ntīi nuu utun e dōó vá'a ñe'e, vata kaa chetun, ni da nēé ka nuu i e kúvi nú'u elēfanté, ni ūtun e dōó nuu á'vi i, nī kaá kuaan vitá, nī kaá nteé, ni nuū í e kúvi xuu kuī'xín,

¹³ ni kānelá, nī cho'o e dōó vá'a ñe'e, ni kūtú, ni ū'xén cho'ó, nī cho'o vídin, ni vīnú, ni āseté, ni kīti trigú ni ūtsi tí, ni kīti kaidó, ni lē'ntú, ni ídú, ni

kāreta é ntáñu'u ti, ni ñā'a, ña dóo ntáde tsiñu di. Un tsi nte ntúvi iña ña'á san díko ña.

¹⁴ Ká'an ña ni ñūú Babiloniá san:

—Ña túvī ká kiti vidin e dóo ntio nima ó ne, un ntí'ī dokuika iña o ni un ntí'ī e dóo va'á, e dóo kai'xi iña ó ne, é kūnaá kue'en ve. Nā nanī'i kue'én ka ó ve —ka'an ña.

¹⁵ Ña ntadíko nuu i tsíkān, ña é nī'í dokuika kuénta iña í ne, kuntañi ika ña e dóo u'vī ña é kānto'o ñūú Babiloniá san. Kuntōo nta'xa ñá ne, kueku nteé ña ñuu é vata kaa ña dī'í kaa,

¹⁶ ká'an ñā:

—¡Ña nta'ví ide ñuú e dóo ka'nu san! ¡Ña nta'ví ide ñadī'i, ña inúu doo ntí'í ni dōo kaíto ntee, ni dōo kue'é teku níñi, ni xō'o kiti e kúvi kaá kuaán, ni xūu e dóo nuu á'vi i, ni kiti kuī'xín di!

¹⁷ ¡Uun da'na nchuvīi tsí kúnaa un ntí'ī e dóo nuu á'vi i san! —koo ka'an ña ntádiko san.

Un ntí'í ntí'í tó'o tun ntōó san nī ña ñu'u iní i kan, nī ña ntántikin tó'o ī sán, ni ūn ntí'í ntí'í ña ntáde tsiñu nú ntute ñu'u kān ne, kúntāñi ika ña.

¹⁸ Dā íni ña u'me é kai'xi ñuú san ne, ntáka'an ña:

—¿Va mí'i ntū tuví ka xtuku ñuu é vata kaa sá'ā e dóo ka'nu? —ka'an ña.

¹⁹ Dá'ví mii ña díki ñá xentē'u é ntoo ña dontíni ne, ntaéku ña. Dōo u'vi kúvi ñá ne, un tsi ntákachu'u ntáa ña, ntáka'an ña:

—¡Ña nta'vín idēn, ñuú ka'nu! Dokuíka é io iña ó ne, kukuika ūn ntí'í ntí'í ña'a, ñá ío tun ntōo i é kaika nú ntute ñu'u kān. Ntá tsi uun da'na nchuvīi dú'va tsi nāntatsin —ka'an ña.

²⁰ Ntá tsi kuntōo dínī ntó, ña ntoo e dukún kān, ña ntáduku ntée Xuva ko, nī pustru ñá, nī ña ntáka'an ntódo tú'un ñā, tsí dā xe'é Xuva kō e dóo nto'o ñūú Babiloniá ne, é ntūnáa kuenta iña i vata o dé ña ni ntō.

21 Kidáā ne, uun ánjē, ña e dóo ntii inī í ne, kī'i ña uun xuu ka'nu, vata kaa xodo mólinu é kādin núu o ūtsi trigu káa ne, nakuítá nuu ña mé'ñu ntute ñu'u kán, kaka'an ña:

—Kuan koo nakuítá nuu ú o, ñuú Babilonia e dóo ka'nun. Nté uun ito ká ña kiní ka ña'a sán o.

22 Nté uun ito ña ditó ka é kuēku kinú'u san itsi o, nté choō, nté trunpetá ka. Nā nī'í ka xoó kada tsiñu i da nēé ka nuu i é kāde ña. Nā ditó kañu'ú ka xodo mólinú san te tadin útsi trigú san.

23 Nté uun ito ká ña xí'i nuu ká ñu'ú san nuu o. Ntē ña tekú ka o e dóo vañi ña ntátanta'a san. Nā'a o, ña ntádiko nu á'ví kán ne, kuān te dóo na'nu ña'a ña dá kanii ñūxiví san kídaā né, ñivín ne, dé tatān da éni nta'vín un ntíí ntíí ñuú san —ka'an ánjē san.

24 Dīvi ñuú Babiloniá sa éti niñi ña'a, ña ka'an ntódo tú'un Xuva ko, nī ña ntáduku ntée Xuva ko, ni ūn ntíí ntíí ña'a, ña é nakunáa ntuvi iña i ñūxiví a.

19

1 Dā kúvi ita ntí'xin sá'ā né, tēkú ko tatsin é ña te nté kaa ña'a vañi ña ntáka'an ñá e dukún kán:
¡Dōo va'á Xuva kō!

¡Dōo ka'nu Xuva kō!

Dīvi ñā é nakáku ña kō.

Dōo kaxi'í nuu ka'nu ña.

Dīvi ñā e dóo ntii inī ña.

2 Tsi dóo vá'a ó kadē kú'vē ñá ne,

dōo nuu é ntaā i é kaka'an ña.

Tsí xntéku ku'vē ñá iña ñad'í kini kaa sán ne,

kaka'an ña tsí da mií é kántio e dóo nto'o ña,

tsí nañé'e ña nuu i é kīni kaa dá kanii ñūxiví san,
vata tsí o dé ña.

Ntanáa Xuva ko ni ña vē, e é'ní ña ña'a, ña edé tsiñu iña Xuva ko,

ka'an ñá'a san.

³ Kidáā ne, ntáka'an xtúku ña:

—¡Dōo va'á Xuva kō! ¡Dōo ka'nu Xuva kō! Ú'mē é kaí'xi ñadí'i kini kaa sán ne, dá kaxee kaxee ntii dañu ntūvi —ka'an xtúku tatsín san.

⁴ Ñatā, ña é oko kimi ñá'á san nī ngimi kítí ntantító sán ne, nákuñchítí ntāa ña ñú'u kán, nanú'u ña iní ña Xuva kō, ña tuví nú tēu ka'nú san, ntáka'an ña:

—¡Kuan koo na kōo! ¡Dōo ka'nu Xuva kō! —ka'an ña.

⁵ Kidáā né, tēkú ko uun tatsin é vē'xí nte nú tēu ka'nú san, é kāka'an:

¡Ká'an ntō tsi dóo ka'nu Xuva kō,
un ntí ntí ntó, ña ntáde tsiñu iña ña,
un ntí ntí nto e ntaíko ñu'u nto ña,
kuān té na'nu ñá'a nto, ō ña na'nu ñá'a nto!,
ka'an.

Viko dá tanta'a A Le'ntú san

⁶ Kidáā né, tēkú ko uun tatsin é vata tē ña te un síin ña'a ntáka'an ña. Dító vatā ó kuvi dá kae'nu ntute ka'nu, vatā ó kuvi dá un ntii tsi kākatsin, e ntáka'an ña:

¡Dōo va'á Xuva kō!

¡Dōo ka'nu Xuva kō!

E éni ntu'u Xuva ko, ña dóo ntii iní í, kade kú'vē ñá ve.

⁷ Nā díní koo nakuntōo o.

Na kada ka'nu o ña,
tsí e xée ura i é kōo viko e tánta'a A Le'ntú san ne,
é iō tu'vé ñadí'í ñá ve.

⁸ Ní'i ñā é kunūu ña doo ntii e dóo va'á,
e dóo ntuntoo, e dóo kai'xi.

Tsí doo ntí san ne, vata kaa nuu i e dóo vá'ā ó de
ñá'a, ña ntákuinti'xe i Xuva kō,
ka'an ña.

9 Kidáā ne, kaka'an ánjē sán nī ko:

—Xntēén na'an sá'a: “Nté kui vá'a ña'a, ña e kána ña é kiká'xi ña víko e tánta'a A Le'ntú san” —ka'an ña.

Ne, kaka'an xtúku ña nī ko:

—Sá'ā é tū'un é nuu é ntaā i é kaka'an Xúva kō —ka'an ña.

10 Kidáā ne, nákunchiti ntáá u nú dī'in ánjē sán vata koo é káda ka'nu ú ña, ntá tsi kaka'an ñá nī ko:

—¡Ñá ku kuān xkoón den! Mii tsi Xuva kō é kada ka'nu o ña. Tsí xo'ō né, dadii tsi ntáde tsiñu o ña Xuva kó, ni ūn ntí ntí ta'an o, ña é nī'i tú'un Jēsuu —ka'an ña.

Tsi tú'un Jēsúu ne, divī é xe'é Xuva kō é ká'an ntódo ña'a, ña ntáka'an náa ña.

Ña nteku idú ku'xin

11 Kidáā né, Iní u e nákaan e dukún kán né, Iní u uun idú ku'xin. Ña'a, ña ntekú ti ne, dú'va nani ña: Ña Kade Ntaa, Ña Kaka'an é Nuú é Ntaā í nani ña. Dá kadē kú've ñá ne, nuu é ntaā í kade ña; dá kade ña du'xēn di.

12 Ntúxnúú ña ne, kaxi'í nuu vatā ó kai'xi ñú'u. Dóo títin le'e odo díki ña. Nteé ña uun divi é ntē xoxo Iní i neé divi, é mii tsi ña Iní ña.

13 Nuú ña doo é kūkií nto'o niñi. Divi ñá ne, Tū'ún Xuva ko nani ña.

14 Áta ña ntántikín sntadun, ña vé'xi e dukún kán. Ñu'u ña doo ntí e dóo va'á, doo ku'xín kue'én ne, ntántodō ñá idú ku'xín di.

15 Xu'u ña kii káa é ntíko ntuvi o nuu i, é ntúku kui'i núu ña un ntí ntí ñuú ñuxiví a. Káa kúvi tatun é kadā kú've núu ña. Vatā ó kaedín nuu ña dī'in ña tñti'ó san ne, kuān koo vií ña é nī'i ña'a san e dóo

nto'o ña, e dóo kudíin Xuva kō, ña dóo ntii inī í san ni ñā.

¹⁶ Nteé divī ñá ata dóo ña ni dā'ntá ña, é kāká'an: “Rei, ñá odo nūú, nī Tó'o, ña odo nūu”, ka'an.

¹⁷ Kidáā né, inī u uun ánjē, ña ntítsi ntōdo ata ngántíi san. Un ntii tsī kána ña un ntíí ntíí láa, kiti ntaíko e dukún kán, kaka'an ña:

—Ní'í nto, nataká nuu nto, tsí ña te un siin kúñu ta'xi Xuva kō é ká'xi nto.

¹⁸ Ka'xí nto kúñu rei san nī tó'ō sntadun ni ña dóo diin, nī kúñu idú nī ña ntántodō ti. Ka'xí nto kúñu ūn ntíí ntíí ña'a, kuān te ñá ntoo vá'a, kuān te ñá ntáde tsiñu, te kuetsi te na'nu ña —ka'an ánjē san.

¹⁹ Kídaā né, inī u kiti e dóo donchu'ví kaa san, nī rei iña ñá ntoo ñuxiví san, nī sntadun ña. Nataká nuu ña é vií ñá du'xen nī ña nteku idú kuí'xín san, nī sntadun ña.

²⁰ Ntá tsi tñn ña kiti sán nī ña kāká'an dóvete é kuenta iña Xuva ko kaká'an ña, ña idé nuu i e dóo na'nu kuenta iña kiti dóo donchu'ví kaa san, é kūdii éni nta'ví ña ña'a, ña é nteé na'a káa kiti san, nī ña ntánuu inī i santu ti. Ña tsíkán ni kiti dóo donchu'ví kaa sán ne, kantíto tsi ña, nakuíta nuu ña ña ni tī mé'ñu ñū'u du'xé san é ña te kantá'va kue'en tsi.

²¹ Ña nguī sán ne, xí'i nūu ña káa e kí xu'u ña nteku idú san ne, un ntíí ntíí láa san é'xi nta'ā ti kúñu ña xí'í san.

20

Uun míil kuā

¹ Kidáā né, inī u kí uun ánjē e dukún kán, ni'í nta'a ña ntakāá xi'i tótsín san ni kadena ká'nu.

² Tñn ña kiti ña vá'ā san, kiti ata san é diablu tñ ni Satānaá ne, kī'ní va'ā ñá ti kadená san, é uun míil kuā kunu'ní ti.

³ Nākuitá nuu ña ti ini totsín san ne, nakadī ñá xu'u i. Dávī nuu ña xu'u totsín san vata koo é ña kani nta'ví ka tí ña'a san ñuxiví san da nté ntí'i é uun míil kuíá san. Te ita ntí'xin é uun míil kuíá san ne, nantuté ña ti uun da'na.

⁴ Kidáā né, íní u nú teu na'nu, mí ntoo ña'a, ña é nī'i i é kadā kû've. Íní u nima ñá'a dí, ña e é'nte tu'un ña'a san díki i e ntántikin ñá Jesuú ne, nī é ntáka'an ntódo ña tú'un Xuva kō dí. Ña sá'á ne, ñá ni ínúu ini ña kiti san, nté santu ti; ntē ña ni xé'e ña é kuntēe káa tī xteen ña, nté ntā'a ña. Íní u tsi ntóto ña ne, nāni'i xtúku ña ntuvi iña ñá ne, kada kú'vē ñá nī Cristu uun míil kuíá.

⁵ Ntá tsi ña nguī sán, ña xi'í ne, ña ntóto ña dā nté kuíta ntí'xin é uun míil kuíá. Da sá'ā é kuvi ūun ito ntoto ña.

⁶ ¡Nté kui vá'a ñá'a, ña é ntáduku ntée i é ntóto é kuvi ūun ito doxi'í san, tsí ntáduku ntée ña Xuva kō! É kuvi ūví doxi'í san ne, ña kúvi víi ka ni ñá, tsi víi ña dutu Xúva ko nī Cristu. Dadí tsi kadā kú'vē ñá ni ñá é uun míil kuíá.

Dā ko'xó ntēe tó'ō e ña vá'ā san

⁷ Tē kúvi ita ntí'xin é uun míil kuíá san ne, nantuté Xuva kō tó'ō e ña vá'ā san mí nuu kutū.

⁸ Tē ntíi ne, kani nta'ví ña'a ngimí o diñi ñuxiví san, un tsi nté Goo ni Mágoo, ña ntaínchu'vi Xúva ko, kāna ña é natāká nuu ña é vii ñá du'xēn; ntē ña kui ká'vi o ña é ña te da dii da díi ña, vata kaa kuvi tsókō.

⁹ Kuédadí tsi kūxée ña kaní ñūxiví san ne, edí nuu ña mi ntántoo ña'a, ña ntáduku ntée Xuva ko, ni ñūú e dóo kakuinima Xúva kō. Ntá tsi kuíta nuu Xuva ko ñū'u é vē'xí nte e dukún kán ne, uun ito tsi í'xi un ntí ntí ña'a san.

10 Tō'o é ña vá'a san e éni nta'ví ña'a sán ne, nákuítá nuu Xuva ko i mē'ñú i mí kai'xi ñú'u dū'xé san, mí tuví kiti dóo donchu'ví kaa san ne, nī ña é kākā'an dóvete é iña Xuva ko kaká'an ña. Ikān né, dōó nto'o ña, ntuni ñá, ntē ntúvi ntē níñu é ntii dañu ntūvi.

Tē xntéku kū'vé Xuva kō nú tēu kui'xín san

11 Kidáā né, ĩnī u uun nú tēu ka'nu é kuī'xín, ni ūun ña'a, ña tuví nti'i ikān. Ñuxiví san nī e dukún kán né, ntoko ñu'u miī dá ini tuví ña.

12 Kidáā né, ĩnī u un ntíí ntíí ña xi'í san, te kuetsi te na'nu ña, ntáñí ñá nú tēú san. Ne, nākaán Xuva ko tūtú san ni tūku tutu mí ūve na'a díví ña'a, ña é nī'i i ntuvi iña i. Xntékú kū'vé Xuva ko iña ña xi'í san vatā o dé ña, vatā ó uve na'a ini tutú san.

13 Ntute ñu'ū sán ne, nakué'e un ntíí ntíí ña'a, ña é teni ĩnī i kán. Doxi'í san nī mí kadē kū'vé doxi'í san ne, nakué'e ña'a, ña ñu'u vá'a ikān di. Xntékú kū'vé Xuva ko iña ña, un ntíí ntíí ñá, vata tsī o dé ña.

14 Kidáā né, nakuitā ñá doxi'í san, nī mi ntántoo ña xi'í san mé'ñu i mí kai'xi ñú'ú san. Ñú'ū sán ne, diví é ká'an o é doxi'i é kivi ūvi.

15 Ña'a, ña é ña tuví díví í uve na'a ini tutu mí uve na'a xoo é nī'i i ntuví va'á iña í ne, nákuítá nuu ña i mé'ñu ñu'ú san.

21

E dukún xēé ni ñūxiví xēe

1 Kidáā né, ĩnī u uun e dukún xēé ni ūun ñuxiví xēe. Tsí e dukún kan ni ñūxiví sa é tuví kidaā ne, ntoko ñu'u miī. Nté ntute ñu'ū ña tuví ka.

2 Xu'u é Juaán u ne, ĩnī u ñuu é kāduku ntée Xuva kō, é Jerusaleen Xēé nanī. Nte e dukún kan vē'xi,

nre mí tuví Xuva kō. É iō tu've vata kaa uun ñadř'i é tıntetu ña e tánta'a ña ni xř ña.

³ Těkú ko uun tatsin é dukún kãn e dóo ntii kaka'an:

—Koto nto ve, tsí Xuva ko tūví ña ni ñā'a san ve. Kuntoo ña ni ñā ne, kuvi ña ña ñuú ña. Xuva kō né, mii ña kutuvī ñá ni ñā, é viī ñá Xuva ñā.

⁴ Xuva kō ne, nakué'e ña un ntíí ntří ntute nūú ña'a sán ne, ña kóō ká doxi'i; ntē ña kunta'xa iní ka ña; ntē ña kuekú ka ña; ntē ña kaxnúu ka ñā. Tsi é ita ntí'xin un ntí'ř e kúvi di'na —ka'an tátsín san.

⁵ Kidáā ne, ña tuví nú tēu ka'nú san ne, kaka'an ña:

—Koton, tsí kade vá'a xeé u un ntí'i nuū i —ka'an ña.

Kaka'an xtúku ña:

—Xntēén na'an sá'ā, tsi tú'ūn é nuu é ntaā í é kaka'án u ni ō —ka'an ña.

⁶ Kidáā ne, kaka'an ñá nī ko:

—É kūvi ve. Xu'u é di'na ú ne, xu'u é nantř'i ú di. Vata kaa letra Á ni lētra Z kaa u. Te xōó kaitsi í ntute ne, kué'ē ú doméni é kō'o ña mí kākii ntute é tā'xi ntuvi iña ña.

⁷ Xoó ña'a é kūvi vií ña ne, ní'i ñā é un ntí'i nuū i sá'a ntā'a kó ne, kuvi ú Xuva ñā né, divi ñā ne, kuvi ña i'xá ko di.

⁸ Ntá tsi ña'a, ña e dóo ixó i, ña é ña ntákuinti'xe i, ña e dóo kini ntāa nima í, ña e ntaéni dikí ta'an i, ña e ntáde tatān, ña ntánuu iní i santu, nī ña veté ne, kuan ō ña é nī'i ña é kōko ña mí kai'xi ñú'u dū'xé san. Sá'ā é kui ūví doxi'í ña —ka'an ña.

Jerusaleen Xee

⁹ Kidáā ne, xée ūun ánjē, ña é ū'xe ñá'a san, ña é nī'i i é ū'xe é'xin é ñū'u u'xe nuu i é nanto'o Xuva kō ña'a sán ne, kaka'an ñá nī ko:

—Ni'in, dá nanē'e ú o ña da vé tanta'a, ñadĩ'í A Le'ntú san —ka'an ña.

¹⁰ Espíritū Sántū sán ne, kue'en ní'i ñā kó uun xuku ka'nu, xuku e dóo dūkun. Náñē'e ñá ko ñuu é kāduku ntée Xuva kō, ñuu é nani Jerusāleen Xee, dīvī é vē'xí nte e dukún kān, mí tuví Xuva kō.

¹¹ Ñuú sā'á ne, kaxi'í nuu ni ntuve Xuva kō ne, ñú'u ī ne, kai'xi vātā ó kai'xi xuu é nanī jaspe e dóo nuu á'vi i, e dóo kaxi'í ni'ni e nté kaa te xūxu kúvi.

¹² Kanīī dīñī ñuú san ne, ntitsi ntó'o e dóo ka'nu, e dóo dukún ne, ñu'u uxuví xi'i i. É un é un xi'í san ne, ntáñī ntee kui kui uun ánjē. É un é un xi'í san ne, uve dīvī é uxuvi tátá ña Israeé san.

¹³ Unī únī xi'í san ntántii é un é un ntíko dīñī i.

¹⁴ Uxúvi xūu na'nu xi'i ntíi etí nto'ó san ne, uve na'a é un é un xúu san uun dīvī pustru Á Le'ntú san.

¹⁵ Ánjē, ña kaka'an ní ko ne, ni'i nta'a ña uun ntoo e kúvi kaá kuaan é kī'i kú've núu ñá ñuú san ni xi'i i, ni nto'ó í dī.

¹⁶ Dadīī tsi kú've ntī'ī ngīmí o dīñī i. Ánjē sán ne, kī'i kú'vē ñá ñuú san ni nto'ó í ne, uvi míil ūvī sientu kilumétru. É kāni, e dukún, nī e ni'í ne, dadīī ntīī ntīī tsi kú'vē i.

¹⁷ Kidáā né, kī'i kú'vē ña ntó'o sán dī ne, únī dīko kīmi métru kīi. Kī'i kú've ánjē san é vatā xkoó kī'i kú'vé ña'a san.

¹⁸ Ntō'ó i ne, xuu é nanī jaspe kúvi ne, ñuú san ne, da mii kuē'en tsi kaá kuaan kúvi da kanīī, vata kaa xuxu e dóo kaxi'í ni'ni.

¹⁹ Xúū é xi'i ntīī etí ntō'ó san ne, ntukutu āta i un ntīī ntīī xuu e dóo va'á, xuu e dóo nuu á'vi i. Etí ntō'ó é kúvi ūun sán ne, xuu é xī'i kuīi é nanī jaspe úve. É kúvi ūvī san ne, xuu kuīi tēkú e dukún kān,

é nani sãfiru, úve. É kuvi ũní san ne, xúu tēku xáa é xī'i raxa, é nani āgata, úve. É kuvi kīmí san ne, xuu kuí kuē'en é vata ito ite ítō, é nani esmēralda.

²⁰ É kuvi ũ'ún san ne, xúu tēku xáa kuē'e é xī'i raxa, é nani ōnice. É kuvi iñú san ne, xuu kué'e é nani crunālina. É kuvi ũ'xé san ne, xúu kuāan é nani crisōlito. É kuvi ũná san ne, xuu kuí tēku ntute ñú'u san, é nani bērilu. É kuvi ñn san ne, xúu kuāan e dóo kai'xi é nani tōpaciú. É kuvi ũ'xí san ne, xuu kuí tēku másana kuii, é nani crisōprasa. É kuvi ũ'xi ñn sán ne, xuu kuí é nani jācintu. É kuvi ũxuví san ne, xuu ntéé é nani amātista.

²¹ Xí'i é ũxuví san ne, uxúvi kiti kuí'xin, kiti nani prela, kúvi. Uun tsi kiti kuvá'a é un é un xi'í san. Itsi mé'ñū ñuú san ne, da mii kuē'en tsi kaá kuaan kúvi ne, kaxi'í ni'ni vatā ó kaxi'í ni'ni xuxu.

²² Nté uun xúkūn ña ni iní u ñuú san, tsí mii Xuva kō, ña e dóo ka'nu sán, nī A Le'ntú san ne, ñi ña kúvi ña xúkūn ñuú san.

²³ Ñuú san ne, ñá kantío i e xi'í nuu ngántí, ntē ña ntío i ntuve xōó ñi, tsi mí tsi ntuve Xuva kō e xi'í nuu. A Le'ntú san ne, ñi kúvi ñu'u e xi'í nuu iña ñuú san.

²⁴ Kaka ña'a, ña da mí'i ká ñuu, mí kaxi'í nuu san. Rei iña ñuxiví san ne, xée ña ñuú san, kuni'i ña e dóo va'á iña ña.

²⁵ Xí'i ñuú san ne, ñá kantādí ntuvi ā, tsí ikān ne, ñá kakuāá ka.

²⁶ Ikān ne, nakué'e ña'a, ña da mí'i ká ñuu, e dóo va'á iña ñá, nuu i e dóo nakuiko ñu'u ñá.

²⁷ Ntá tsi nté uun nuu i é kīni kaa ña kuvi kí'vi ñuú san. Nté uun ña'a, ña é kāde é kīni kaa, nté uun ña vete ña kuvi kí'vi ña ñuú san. Da mii tsi ñá'a, ña

é ūve na'a d̄ivi ī iní tutú A Le'ntú san, tutu mí ūve na'a xoo é nī'i i ntuví va'á iña i ntii dañu ntúvi.

22

¹ Kidáā ne, náñē'e án̄jē sán ko ntute é kainu é tā'xi ntuvi iña ko, ntute é kākii nú tēu ka'nu mí tuví Xuva ko ni Ā Le'ntú san. Dōó kuí ntute san. Kaxi'í ni'ni vatā o kaxi'í ni'ni xuxu.

² Kainu ntute san mé'ñu ītsi ka'nu ñuú san. Ntuví o diñi i ntāñi útun e tá'xi ntuvi iña ko. Uxuvi íto kākii k̄iti i é uun kuia. Ta'án xoo ta'án xoo kākii k̄iti i. Xúku ī ne, kaidiá'vi é kūvi cho'o é ntuvá'a ña'a, ña ntoo ñuxiví a.

³ Ña kóo ká da neē ka nuu i é kā'an Xúva ko tē ña vá'a. Kutuví nú tēu ka'nu Xúva ko ni Ā Le'ntú san ñuú san ne, ña ntáde tsiñu iña ñá ne, kunuu ini ñá ña.

⁴ Kiní ña nuu Xuva kó ne, kuntēé d̄iví Xuva kō xteén ña di.

⁵ Ikān ne, ñá kuāá ka, ntē ña kantío ká ña ñu'u, nté ngántii, tsí mii Xuva ko naxī'í nuu ña ña. Kidáā né, kuntoo ña ni Xuva ko, kadā kú'vē ñá ntii dañu ntúvi.

E k̄akuetsin ntuvi é nainu Jesúcristu

⁶ Kidáā ne, kaka'an xtúku án̄jē san ní ko:

—Kuvi kuinti'xe o tú'ūn sa'á, tsi tú'ūn é nuu é ntaā i. Xuva kō, ña é kaxé'e tú'ūn é kā'an ña ntáka'an ntódo kuenta iña ñá ne, e táxnūu ña án̄je ñá é nañē'e ñá ña'a, ña ntáde tsiñu iña ñá, neē é vē'xí kuvi —ka'an án̄jē san.

⁷ Kidáā né, mii Jēsuu kaká'an ña:

—¡Koto nto! ¡E dóko s̄a naínú u! ¡Nté kui vá'a ña'a, ña e ntáde kuenta é ūve na'a ini tutú s̄a'a! —ka'an Jēsuu.

⁸ Xu'u é Juaán u ne, tēkú ko ne, iní u nuu mií ko un ntíi sá'a. Dā kúvī téku kó, nī dá iní u ne, nákunchiti ntāa ú nuu ña nañ'e kó nuu i sá'a, é kunūu iní ko ña.

⁹ Ntá tsi kaka'an ñá nī ko:

—¡Ñá ku kuān xkóon dēn! Xu'ú ne, kūdii kade tsiñu ú iña Xuva kó, vatā ó kade tsiñun di, ni ēni ó, ña ntáka'an ntódo tú'un Xuva ko, nī ña ntáde ntaa é ūve na'a tutú sá'a. Mii tsi Xuva kō é kunūu ini ko ña —ka'an ña.

¹⁰ Kaka'an xtúku ña nī ko:

—Ñá ku xnuun xū'un tú'ūn é kuīta ntí'xin é ūve na'a tutú sá'a, tsí kakuetsin ntuvi é kūntaa.

¹¹ Nii dukuān ne, ña é kāde nuu i é ña vá'a ne, na vīi mii ña. Ña é kāde é kīni kaa né, na vīi mii ñá di. Ntá tsi ña'a, ña é kāde nuu i é vā'á ne, na vīi ka ña ne, ña'a, ña é kāde é ntio Xuva ko ne, ñá ku xtuvī mii ña é kāde ña —ka'an ña.

¹² Kaka'an Jésuu:

—Koto nto, tsí ña ná'ā ka dá nainu xtúku u. Tē nainú u ne, kué'e ú doméni un ntíi ntíi ña'a kuenta iña í vata tsí o dé ña.

¹³ Xu'u é dī'na ú ne, xu'u é ntii u átā í di, vata kaa letra Á ni lētrá Z. Xu'u éni ntū'u ú ne, xu'ú nantī'í ú di —ka'an ña.

¹⁴ Nté kui vá'a ña'a, ña é kānakate doo i, tsí duku ntée ña é tīn ña kití utun é tā'xi ntuvi iña ko, vata koo é kūvi k'vi ña xi'i ñúú san.

¹⁵ Ntá tsi ña kini ntáa sán ne, kí'i kan kū'un ñá ne, kí'i kan kū'un ntíi ntíi ñá vata kaa ña tatán, nī ña kaeni dikí ñad'í, nī ña kae'ní ña'a, nī ña kanuu iní i santú, ni ūn ntíi ntíi ña é ntio i doveté, nī ña kaeni nta'ví ta'an i di.

¹⁶ Kaka'an Jésuu:

—Xu'u é Jesuú u ne, taxnūu u ánjē ko é kā'an ntódo ña nī é ū'xe xúkūn sán nuu i sá'a. Xu'ú ne,

tatá Davii vé'xi ú ne, i'xá ika ñā kó di. Xu'ú ne, vata kaa kími é káxi'í nuu te vē'xi túvi kaa u —ka'an ña.

¹⁷ Espíritū Sántū sán ni ñad'í A Le'ntú san ne, ntáka'an:

—¡Ni'í nto! —ka'an ña.

Da xōo ka ña'a, ña é kātekú i ne, na kā'an ñá di:

—¡Ni'í nto! —koo ka'an ña.

Da xōo ka xoo é kaitsi í ntute, ni da xōo ka xoo é ncho ko'o i ne, na kī'xi, dá kō'o doméni ntute é tā'xi ntuvi iña ko ntii dañu ntúvi.

¹⁸ Un ntíí ntíí ña'a, ña kateku i tú'un nēe é vē'xi kuvi é ūve na'a ini tutú sá'á ne, ntē vevíí tsi ká'ān ú ni ña nuū i sá'a: Tē xoó xntēkú ka i é ūve na'a í'a ne, xntēkú ka Xuva kō é nto'o i vatā ó uve na'a ini tutú sá'a é ntō'o i.

¹⁹ Tē xoó naki'i ká i tú'ūn é ūve na'a ini tutú sá'a nté koo kuvi ne, Xuva kō ne, naki'i ña vata kaa é kāduku ntēe ña kiti utun é tā'xi ntuvi iña kó ne, ñá kī'ví ña ñuú Xuva ko, vatā ó kaka'an ini tutú sá'a.

²⁰ Ña kaka'an ntódo tú'ūn sa'á ne, kaka'an ña:

—Nuu é ntaā í, tsí ña na'á ka dá nainú u —ka'an ña.

Kuan koo na kōo. ¡Kí'xi nto, Tó'o ko Jēsuu!

²¹ Na nāxnuu viko Tó'o ko Jesūcristu ntó, un ntíí ntíí nto. Kuan tsi koo na kōo.

**Tū'ún xuva kō vatā ó ntáka'an ña ñuú
Coatzospan
New Testament in Mixtec, Coatzospan
(MX:miz:Mixtec, Coatzospan)**

copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

8f775598-56d9-56fd-966e-15e054d2f275